

舊五代史

七

蘇氏藏書
印

舊五代史卷三十六

宋司空同中書門下平章事薛居正等撰

明宗紀第二

唐書十二

天成元年夏四月丙午帝自興聖宮赴西宮文武百僚
縞素于位帝服斬衰親奉攢塗設奠哭盡哀乃于柩前
卽皇帝位百官易吉服班于位帝御袞冕受冊訖百僚
稱賀丁未羣官縞素赴西宮臨以樞密使安重誨爲檢
校司空守左領軍大將軍依前充樞密使宰臣豆盧革
等三上表請聽政從之遣使往諸道及淮南告哀辛亥
帝始聽政于興聖殿王子西南面副招討使工部尙書

任圖率步騎二萬六千人入見甲寅帝御文明殿受朝制改同光四年爲天成元年大赦天下後宮內職量留一百人內官三十人教坊一百人鷹坊二十人御厨五十人其餘任從所適諸司使務有名無實者並停分遣諸軍就食近畿以減饋送之勞秋夏稅子每斗先有省耗一升今後祇納正數其省耗宜停天下節度防禦使除正至端午降誕四節量事進奉達情而已自于州府圓融不得科斂百姓其刺史雖遇四節不在貢奉諸州雜稅宜定合稅物色名目不得邀難商旅租庸使先將係省錢物與人廻圖宜令盡底收納以塞倖門云乙卯

渤海國王大諲譔遣使朝貢是月北京副留守知留守
事張憲賜死以其失守故也五月丙辰朔帝不視朝臨
于西宮宰相豆盧革進位左僕射韋說進位門下侍郎
兼戶部尚書監修國史並依舊平章事兗州節度使檢
校太傅朱守殷加同平章事充河南尹判六軍諸衛事
滄州節度使檢校太傅安元信加同平章事移鎮徐州
邠州節度使檢校太保毛瑋加同平章事以太子賓客
鄭珏爲中書侍郎兼刑部尚書同中書門下平章事以
工部尚書任圜爲中書侍郎兼工部尚書同中書門下
平章事判三司徐州節度使李紹眞貝州刺史李紹英

齊州防禦使李紹虔河陽節度使李紹奇洛州刺史李紹能等上言前朝寵賜姓名今乞還舊內李紹虔上言臣本姓王後移杜氏蒙前朝賜今姓名乞復本姓詔並可之李紹真復曰霍彥威李紹英復曰房知溫李紹虔復曰王晏球李紹奇復曰夏魯奇李紹能復曰米君立青州節度使檢校太傅同平章事符習加兼侍中徐州節度使檢校太傅霍彥威加兼侍中移鎮鄆州丁巳初詔文武百僚正衙常參外五日一度內殿起居案五代會要載天成元年五月三日敕令後宰臣文武百官除常朝外每五日一度入內起居其中書非時有急切公事請開延英不在此限麟州奏指揮使張延寵作亂焚剽市民已殺戮

訖戊午河陽節度使夏魯奇加檢校太傅以貝州刺史
房知溫爲兗州節度使以齊州防禦使王晏球爲宋州
節度使以洺州刺史米君立爲邢州節度使己未賜文
武百官各一馬一驢西都知府張鑣進魏王繼岌打毬
馬七十二疋北京馬步都指揮使李從溫奉準詔誅宦
官初莊宗遇內難宦者數百人竄匿山谷落髮爲僧奔
至太原七十餘人至是盡誅于都亭驛辛酉詔華州放
散西川宮人各歸骨肉壬戌以前襄州刺史北京左右
廂都指揮使安金全爲安北都護振武節度使同平章
事甲子前西都留守京兆尹張筠加檢校太傅充山南

西道節度使以夔州節度使李紹文爲遂州節度使以
前鄧州留後戴思遠爲洋州節度使丁卯以金吾將軍
張實爲金州防禦使戊辰以金紫光祿大夫檢校司空
趙在禮爲滑州節度使加檢校太保制下在禮以軍情
不順爲辭不之任以許州留後陶玘爲鄧州留後以諸
道馬步副都指揮使安審通爲齊州防禦使庚午以權
知北京軍府事汾州刺史符彥超爲晉州留後以前陳
州刺史劉仲殷爲陝州留後癸卯以前磁州刺史劉彥
琮爲同州留後甲戌福州節度使檢校太傅王延翰加
檢校太尉同平章事乙亥翰林學士戶部侍郎知制誥

馮道翰林學士中書舍人趙鳳俱以本官充端明殿學

士端明之職自此始也

案五代會要云明宗初登位四方書奏多令樞密使安重誨讀

之不曉文義于是孔循獻議因唐室侍讀之號卽創端明學士之名命馮道等爲之丙子詔故西

道行營都招討制置等使守侍中監修國史兼樞密使

郭崇韜宜許歸葬其世業田宅並還與骨月故萬州司

戶朱友謙可復護國軍節度使守太師兼尙書令河中

尹西平王所有田宅財產並還與骨月丁丑西都衙內

指揮使張籤進納僞蜀主王衍犀玉帶各兩條馬一百

五十匹初莊宗遣中宮向延嗣就長安之殺王衍也旋

屬蕭墻之禍延嗣藏竄不知所之而衍之資裝妓樂並

爲錢所有復懼事泄故聊有此獻戊寅以樞密使安重
誨兼領襄州節度使制下重誨之黨謂重誨曰襄州地
控要津不可乏帥無宜兼領重誨卽自陳退許之以左
金吾大將軍張遵誨爲西京副留守知留守事辛巳以
衛尉卿李懌爲中書舍人充翰林學士壬午以前蔚州
刺史張溫爲振武留後以左右廂突陣指揮使康義誠
爲汾州刺史以左右廂馬軍都指揮使索自通爲忻州
刺史尙父吳越國王錢鏐遣使進金器五百兩銀萬兩
綾萬疋謝恩賜玉冊金印初同光季年鏐上疏密求玉
冊金印郭崇韜進議以爲不可而樞密承旨段佶受其

重賂贊成其事莊宗卽允其請至是故有貢謝甲申幽
州節度使檢校太保李紹斌加檢校太傅同平章事復
姓名爲趙德鈞乙酉詔百官朔望入閣賜廊下食自亂
離已前常參官每日朝退賜食于廊下謂之廊餐乾符
之後百司經費不足無每日之賜至是遇入閣卽賜之
案五代會要云明宗初卽位命百官五日一起居李琪
以爲非故事請罷之惟每月朔望日合入閣賜食至是
宣旨朔望入閣外仍五日一起居遂爲定式六月戊子前襄州節度使李紹
珙起復依前襄州節度使仍復本姓名曰劉訓以皇子
河中留後從珂爲河中節度使百寮表賀以翰林承旨
兵部尙書知制誥盧質爲檢校司空充同州節度使已

丑以吏部尙書判太常卿事李琪爲御史大夫以禮部尙書崔協爲太常卿判吏部尙書銓事以御史中丞崔居儉爲兵部侍郎以太子賓客蕭頊爲禮部尙書中書奏請以九月九日皇帝降誕日爲應聖節休假三日從之故忠武軍節度使檢校太師兼尙書令齊王張全義贈太師以前尙書右丞崔沂爲尙書左丞丙申新州留後張庭裕雲州留後高行珪並正授本軍節度使丁酉詔曰四夷來王厯代故事前後各因強弱無制互有典儀大蕃須示于威容卽于正衙引對小蕃但推于恩澤仍于便殿撫懷憲府奏論禮院詳酌皆徵故實或有明

文正衙威容未可全廢內殿恩澤且可常行若遇大蕃
入朝卽准舊儀于正殿排比鋪陳立仗百官排班于正
門引入對見時百寮入閣班退後却引對朝貢蕃客御
史大夫李琪奏論之下禮院檢討而降是命焉戊戌樞
密使安重誨加檢校太保行兵部尙書事如故以太子
詹事劉岳爲兵部侍郎以太子右庶子王權爲戶部侍
郎以太子左庶子任贊爲工部侍郎庚子荆南節度使
檢校太師兼尙書令南平王高季興加守太尉兼尙書
令澤潞節度使檢校太傅同平章事孔勍加兼侍中汴
州屯駐控鶴指揮使張諫等謀叛伏誅以樞密使孔循

權知汴州軍州事甲辰樞密使孔循加檢校太保守秘書監依前充使己巳秘書少監姚顗爲左散騎常侍以太子左諭德陸崇爲右散騎常侍以兵部郎中蕭希甫爲左諫議大夫前幽州節度判官呂夢奇爲右諫議大夫以鄴都副留守孫岳爲潁州團練使詔曰古者酌禮以制名懼廢于物取其難犯而易避貴便于時况徵在二名抑有前例以太宗文皇帝自登寶位不改舊稱時卽臣有世南官有民部靡聞曲避止禁連呼朕猥以眇躬託于人上止遵聖範非敢自尊應文書內所有二字但不連稱不得迴避如有臣下之名不欲與君親同字

者任自改更丁未中書門下奏京城潛龍舊宅望以至
德宮爲名從之戊申夏州節度使開府儀同三司檢校
太師兼中書令朔方王李仁福加食邑一千戶以延州
留後高允韜爲延州節度使以利州節度觀察留後張
敬詢爲利州節度使劔南西川節度副大使知節度使
事孟知祥加檢校太傅兼侍中劔南東川節度副大使
知節度事董璋加檢校太傅王子鳳翔節度使檢校太
尉兼中書令李從曠加檢校太師兼中書令汴州知州
孔循奏召集謀亂指揮使趙虔已下三千人並誅族訖
甲寅以晉州留後符彥超爲北京留守以鎮州副使王

建立爲鎮州留後以右龍武統軍安崇阮爲晉州留後
荆南節度使高季興上言夔忠萬三州舊是當道屬郡

先被西川侵據今乞却割隸本管詔可之其夔州僞蜀

先曾建節宜依舊除刺史

通鑑攷異引十國紀年荆南史天成元年二月壬辰請忠

夔萬州及雲安監隸本道莊宗許之詔命未下
莊宗遇弒六月壬辰王表求三州明宗許之

秋七月

乙卯朔以太原舊宅爲積慶宮庚申契丹渤海國俱遣

使朝貢甲子詔割韓城邵陽兩縣屬同州誅滑州左右

崇牙及長劍等軍士數百人夷其族作亂故也其都校

于可洪等相次到闕亦斬于都市丁卯以僞蜀守司空

門下侍郎平章事晉國公王諧爲檢校司空守陵州刺

史以虢州刺史石潭爲耀州團練使辛未詔諸道節度
刺史文武將吏舊進月旦起居表今後除節度留後團
級防禦使惟正至進賀表其四孟月並且止絕甲戌中
書門下上言宣旨令進納新授諸道判官州縣官官告
敕牒祇應宣賜準往例除將相外並不賜官誥卽因梁
氏起例凡宣授官並特恩賜臣等商量自兩使判官令
錄在京除授者卽于內殿謝恩便辭赴任不更進納官
誥判司主簿不合更許朝對敕下後望準舊例處分從
之乙亥莊宗皇帝梓宮發引帝緣服臨送于樓前是日
葬莊宗于雍陵鎮州留後王建立奏涿州刺史劉殷肇

不受代謀叛昨發兵收掩擒劉殷肇及其黨一十三人見折足勘詰已卯以比部郎中知制誥楊凝式爲給事中充史館修撰判館事以僞蜀吏部尙書楊玢爲給事中充集賢殿學士判院事升應州爲彰德軍節度仍以興唐軍爲寰州隸彰國軍宰相豆盧革貶辰州刺史韋說貶敘州刺史仍令所在馳驛發遣爲諫議大夫蕭希甫疏奏故也制略曰革則縱田客以殺人說則侵鄰家而奪井選元亨之上第改王參之本名或主掌三司季元隨之務局或陶鎔百里受長吏之桑田咸屈塞于平人互阿私于愛子任官匪當黷貨無厭謀人之國若斯

致主之方安在旣迷理亂又昧卷舒而府司案牘爰來
諫署奏章叠至備彰醜迹深汚明庭是宜約以三章投
之四裔其河南府文案及蕭希甫論疏並宜宣示百寮
庚辰賜蕭希甫衣段二十疋銀器五十兩賞疏革說之
罪也宰相鄭珏任圜再見安重誨救解革說請不復追
行後命又三上表救解俱留中不報辛巳以捧聖嚴衛
左廂馬步軍都指揮使李從璋領饒州刺史充大內皇
城使中書門下奏條制檢校官各納尙書省禮錢舊制
太師太尉納四十千後減落至二十千太傅太保元納
錢三十千減至十五千司徒司空元納二十千減至一

十千僕射尙書元納一十五千減納七千員外郎中元
納一十千今納三千四百者詔曰會府華資皇朝寵秩
凡霑新命各納禮錢爰自近年多隳舊制遂致紀綱之
地遽成廢墜之司况累條流就從減省方當提舉宜振
規繩但緣其間翊衛勳庸藩宣將佐自軍功而遷陟示
恩澤以獎勵須議從權不在其例其餘自不帶平章事
節度使及防禦團練刺史使府副使行軍已下三司職
掌監務官州縣官凡關此例並可徵納其檢校官自員
外郎至僕射祇初轉一任納錢若不改呼不在徵納仍
委尙書省部司專切檢舉置曆逐月具數申中書門下

癸未詔辰州刺史豆盧革可責授費州司戶參軍敘州
刺史韋說可責授夷州司戶參軍皆員外置同正員仍
令馳驛發遣甲申又詔曰責授費州司戶參軍豆盧革
夷州司戶參軍韋說等自居台輔累換星華負先皇倚
注之恩失大國變調之理朕自登宸極常委鈞衡略無
謙遜之辭但縱貪饕之意除官受賂樹黨徇私每虧敬
于朕前徒自尊于人上道路之誼騰不已諫臣之條疏
頗多罪狀顯彰典刑斯舉合從極法以塞羣情尙緣臨
御之初含弘是務特軫墜泉之慮爰施解網之仁曲示
優恩俯寬後命革可陵州長流百姓說可合州長流百

姓仍委逐處長知所在同州長春宮判官朝請大夫檢校尚書禮部郎中賜紫金魚袋豆盧昇將仕郎守尚書屯田員外郎崇文館學士賜緋魚袋韋濤等各因權勢驟列班行無才業以可稱竊寵榮而斯久比行貶謫以塞尤違朕以纂襲之初含容是務父既寬于後命子宜示于特恩並停見任昇濤卽革說之子也

永樂大典卷七千一百六

三十

舊五代史卷三十六終

舊五代史卷三十六攷證

唐明宗紀二西都知府張錢張錢原本作張鏐今據

通鑑改正

故萬州司戶朱友謙萬州原本作萬州今據歐陽史

改正

樞密承旨段徊段徊九國志作段懷攷歐陽史及通

鑑並作段徊今仍其舊

正衙威容正衙原本訛王衛今據冊府元龜改正

是日葬莊宗于雍陵雍陵原本作永陵攷徐無黨五

代史注莊宗陵名雍陵石晉時避諱稱伊陵原本永

字誤今改正又莊宗葬日通鑑從哀冊文作丙子是
書從實錄作乙亥

改王參之本名 案王參疑有舛誤據冊府元龜引薛
史亦作王參今無可攷姑仍其舊

舊五代史卷三十六攷證

舊五代史卷三十七

宋司空同中書門下平章事薛居正等撰

明宗紀第三

唐書十三

天成元年秋八月乙酉朔日有食之有司上言莊宗廟
室酌獻請奏武成之舞從之鄆州節度使霍彥威移鎮
青州丁亥莊宗神主祔廟有司請祧懿祖室從之詔陵
州合州長流百姓豆盧革韋說等可並自長流後縱逢
恩赦不在原宥之限豆盧昇韋濤仍削除自前所受官
秩壬辰以久雨放百僚朝參詔天下疏理繫囚甲午汴
州奏舊管曹州乞却歸當道從之是日詔曰承前使府

奏請判官率皆隨府除移停罷近年流例有異前規使府隨已除移判官元安舊職起今後若是朝廷除授者卽不計使府除移如是使府奏請卽皆隨府移罷舊例蕃侯帶平章事者所奏請判官殿中已上許奏緋中丞已上許奏紫今不帶平章事亦許同帶平章事例處分如防禦團練使奏請判官員外郎已下不在奏緋之限其所奏判官州縣官並須將歷任告身隨奏至京如未有官假稱試攝亦奏狀內分明署出如藩鎮留後權知軍州事並不在奏請判官之限如刺史要奏州縣官須申本道請發表章不得自奏近日州使奏請從事本無

官緒妄結虛銜不計職位高卑多是請兼朱紫不惟紊亂實啟撓求宜令諸道州府切準敕命處分丁酉內出象笏三十四面賜百官之無笏者己亥帝御文明殿百官入閤月望如月朔之儀從新議例也荆南高季興上言峽州內三州請朝廷不除刺史幽州奏契丹寇邊詔齊州防禦使安審通率師禦之辛丑以前青州節度使符習爲鄆州節度使以前華州節度使史敬鎔爲安州節度使乙巳禁鎔錢爲器仍估定生銅器價斤二百熟銅器斤四百如違省價買賣者以盜鑄錢論丁未樞密使院條奏諸道節度使刺史內有不守詔條公行科斂

須行止絕州使所納軍糧不得更邀加耗節度使刺史
所置牙隊許于軍都內抽取便結省司衣糧况人數已
多訪問尙有招致諸色人多有抵罪亡命便于州府投
名爲使下元隨邀求職務凌壓平人及有力戶人于諸
處行賂希求事務亦有州使妄稱修葺城池廨宇科賦
于人及營私宅諸縣鎮所受州使文符如涉科斂人戶
不得稟受州府不得賒買行人物色兼行科率已前條
件州使如敢犯違許人陳告勘詰不虛量行獎賞宜令
三京諸道州府準此處分新授青州節度使霍彥威奏
處斬新登州刺史王公儼及同謀拒命指揮使李謹王

居厚等八人訖初同光中符習爲青州節度使宦官楊希望爲監軍專制軍政趙在禮之據魏州習奉詔以本軍進討俄而帝爲亂軍所劫習卽罷歸希望遣兵邀之習懼而還至滑州帝遣人招之習至乃從帝入汴希望聞魏軍亂遣兵圍守習家欲盡殺之公儼素受希望獎愛謂希望曰內侍宜分腹心之兵監四面守陴者則誰敢異圖希望從之公儼乘其無備圍希望之第擒而殺之公儼遂與州將李謹等謀據州城以邀符節卽令軍府飛章留已兼揚言符習在鎮人不便其政帝乃除公儼爲登州刺史公儼不時赴任卽以霍彥威代符習聚

兵淄州以圖進取彥威至淄川會詔使至青州告諭公儼卽赴所任彥威懲其初心遣人擒公儼于北海縣與同黨斬于州東有司上言莊宗祔廟懿祖祧遷準例捨故而諱新懿祖例不諱忌日不行香從之王子襄州節度使劉訓加檢校太傅以僞蜀右僕射中書侍郎平章事趙國公張格爲太子賓客充三司副使從任圖請也九月乙卯朔詔汴州扶溝縣復隸許州以前絳州刺史婁繼英爲冀州刺史充北面水陸轉運制置使己未幸至德宮遂幸前隰州刺史袁建豐之第帝常爲太原內衙親將建豐爲副至是建豐風疾沈廢故親幸其第以

撫之庚申以都官郎中庾傳美充三州搜訪圖籍使傳
美爲蜀王衍之舊寮家在成都便于歸計且言成都具
有本朝實錄及傳美使廼所得纔九朝實錄及殘缺雜
書而已癸亥應聖節百寮于敬愛寺設齋召緇黃之衆
于中興殿講論從近例也戊辰以僞蜀檢校太師兼中
書令右金吾街使張貽範爲兵部尙書致仕都官員外
郎于勣奏稱指揮不得書契券輒賣良人從之癸酉天
策上將軍湖南節度使開府儀同三司守太師兼尙書
令楚王馬殷加檢校太師守尙書令兩浙節度留後靜
海軍節度嶺南西道觀察處置等使檢校太尉兼中書

令錢元瓘加食邑中吳建武等軍節度嶺南東道觀察處置等使檢校太尉兼中書令錢元璪加開府階進食邑甲戌以前代州刺史馬漑爲左衛上將軍致仕己卯以光祿卿羅周敬爲右金吾衛大將軍充街使辛巳以前復州刺史袁義爲唐州刺史詔曰鳳翔節度使李曦世聯宗屬任重藩宣慶善有稱忠勤顯著旣任維城之列宜新定體之文是降寵光以隆敦敘俾煥成家之美貴崇猶子之親宜于本名上加從字癸未文武百寮至張全義私第柩前立班辭以來月二日葬故也冬十月甲申朔詔賜文武百寮冬服綿帛有差近例十月初寒

之始天子賜近侍執政大臣冬服帝顧謂判三司任圜曰百寮散未圍奏曰臣聞本朝給春冬服徧及百寮喪亂已來急于軍旅人君所賜未能周給今止近臣而已外臣無所賜帝曰外臣亦吾臣也卿宜計度圍遂與安重誨據品秩之差以定春冬之賜其後遂以爲常右拾遣曹琮上疏內一件百寮朔望入閣及五日內殿起居請許三署寺監官輪次轉對奏事從之刑部員外郎孔莊上言自兵興以來法制不一諸道州縣常行枷杖多不依格律請以舊制曉諭改而正之丙戌吏部侍郎盧文紀上言請內外交武官寮每歲有司明定考校將相

乞廻御筆以行黜陟疏下中書門下商量宰臣奏請施行從之丁亥雲南嵩州山後兩林百蠻都鬼主右武衛大將軍李卑晚遣大鬼主傳能阿花等來朝貢帝御文明殿對之百寮稱賀庚寅以客省使李嚴領泗州防禦使以河中節度副使李鱗爲太子賓客壬辰邠州節度使毛璋移鎮潞州巴州進嘉禾合穗甲午以前隰州刺史袁建豐遙領洪州節度使庚子幽州奏契丹平州守將僞署幽州節度使盧文進率戶口歸明百寮稱賀辛丑契丹遣使來告哀言國王案巴堅舊作阿保機今改正以今年七月二十七日卒詔曰朕近續皇圖恭修帝道務安夷

夏貴洽雍熙契丹主世預歡盟禮交聘問遽聞凶訃倍
軫悲懷可輟今月十九日朝參丙午以舊州山後兩林
百蠻都鬼主李卑晚爲寧遠將軍大渡河山前邛川六
姓都鬼主懷安郡王勿鄧標莎爲定遠將軍丁未幽州
奏盧文進所率降戶孳畜人口在平州西首尾約七十
里庚戌以吏部侍郎盧文紀爲御史中丞時御史大夫
李琪三上表求解任故也以兵部侍郎劉岳爲吏部侍
郎以戶部侍郎充端明殿學士馮道爲兵部侍郎以中
書舍人充端明殿學士趙鳳爲戶部侍郎並依前充職
壬子靜江軍節度使桂州管內觀察使檢校太師兼中

書令扶風郡王馬寶加食邑實封澧朗觀察使檢校太傅兼侍中馬希振加檢校太尉盧文進至幽州遣軍吏奉表來上十一月戊午以滄州留後王景戡爲邢州節度使青州奏得登州狀申契丹先攻逼渤海國自案巴堅身死雖已抽退尙留兵馬在渤海扶餘城今渤海王弟領兵馬攻圍扶餘城內契丹次己未以翰林學士尙書戶部郎中知制誥劉昫爲中書舍人充職辛酉以前秘書少監溫輦爲太子詹事壬戌以前房州刺史朱罕爲潁州團練使是日詔曰應今日已前修葺得寺院無令毀廢自此以後不得輒有建造如要願在僧門並須官

壇受戒不得衷私刺度癸丑日南至帝御文明殿受朝
賀仗衛如式禮部侍郎裴皞上言諸州刺史經三考方
請替移詔曰有政聲者就加恩澤無課最者卽便替移
密州獻芝草庚午河陽節度使夏魯奇移鎮許州留後
梁漢顓爲邠州節度使淮南楊溥遣使貢獻賀登極乙
亥以前振武留後張溫爲利州昭武軍留後以果州刺
史孫鐸爲漢州刺史充西川馬步軍都指揮使壬午靜
海軍節度安南管內觀察等使檢校太尉兼侍中錢元
球加開府階進食邑癸未鎮州奏準詔盧文進所率歸
業戶口蠲放租稅三年仍每口給糧五斗十二月戊子

盧文進及將吏四百人見賜鞍馬玉帶衣被器玩錢帛
有差詔曰朕中興寶祚復正皇綱萬國駢羅俱在照臨
之內八紘遘覓咸居覆載之間矧彼雲南素歸正朔洎
平僞蜀思錫舊恩于乃眷以雖深欲霈覃而未暇百蠻
都首領李卑晚六姓蠻都首領勿鄧標莎等天資智勇
世稟忠勤梯航之道路纔通琛賁之貢輸已至率其種
落竭乃惓誠備傾向化之心深獎來庭之意今則各頒
國寵別進王封其雋州刺史李及大鬼主離吠等或遙
貢表函或躬趨朝闕亦宜特授官資各遷階秩勉敦信
義無墜冊書示爾金石之盟保我山河之誓欽承休命

永保厥終壬辰帝狩于近郊臘故也甲午以契丹廬龍
軍節度使盧文進爲檢校太尉同平章事充滑州節度
使戊戌詔嚴禁鑼錢庚子皇第二子金紫光祿大夫檢
校司徒從榮加檢校太保同平章事天雄軍節度使鄴
都留守以武安軍馬步軍都指揮使馬希範爲澧州刺
史鐵林都知事馬希杲爲衡州刺史壬寅潁州刺史孫
岳加檢校太保獎能政也丙午中書門下奏故事藩鎮
節度觀察使帶平章事于都堂上事刊石記壁合納禮
錢三千貫以充中書及兩省公使今欲各納禮錢五百
于中書立石亭子鐫勒宰臣使相官氏授上年月餘

充修葺中書及兩省公署部堂什物從之庚戌御史臺奏京城坊市士庶工商之家有婢僕自經投井非理物故者近者以來凡是死亡皆是臺司左右巡舉勘檢施行已久仍恐所差人吏及街市胥徒同于民家因事邀脅臣詢訪故事凡京城民庶之家死喪委府縣檢舉軍家委軍巡商旅委戶部然諸司檢舉後具事由申臺其間或枉濫情故臺司訪聞卽行舉勘如是文武兩班官吏之家卽是臺司檢舉臣請自今以後並準故事施行者詔曰今後文武兩班及諸道商旅凡有喪亡卽準臺司所奏施行其坊市民庶軍士之家凡死喪及婢僕非

理物故依臺司奏委府縣軍巡同檢舉仍不得縱其吏
卒于物故之家妄有邀脅或恐暑月屍柩難停若待申
聞檢舉縱無邀脅亦須經時日今後仰本家喚四鄰檢
察若無他故遂便葬埋如後別聞枉濫妄有保證官中
訪知勘詰不虛本戶隣保並行科罪如聞諸道州府坊
市死喪取分巡院檢舉頗致淹停人多流怨亦仰約京
城事例處分

永樂大典卷七
千一百六十四

舊五代史卷三十七終

舊五代史卷三十七攷證

唐書明宗紀三內出象笏三十四面 三十四歐陽史
作三十二

僞蜀右僕射中書侍郎平章事趙國公張格 張格原
本作張裕攷舊唐書張濬傳濬次子格仕蜀爲平章
事今改正

僞署幽州節度使盧文進 盧文進遼史作盧國用蓋
文進在遼改名國用耳

國王安巴堅以七月二十七日卒 案遼史太祖紀作
七月辛巳上崩

可輟今月十九日朝參 案歐陽史作廢朝三日

契丹次 案契丹次蓋言契丹方卽次也是書前後如
攻城次鎮州次多單用次字疑卽當時案牘之文今
仍其舊附識于此

安巴堅舊作阿保機今改

補前

擒公儼於北海縣斬於州東

通鑑彥威聚兵涪州以圖進取公儼懼乙

未始之官丁酉彥威至青州追擒之

舊五代史卷三十七攻證

舊五代史卷三十八

宋司空同中書門下平章事薛居正等撰

明宗紀第四

唐書十四

天成二年春正月癸丑朔帝御明堂殿受朝賀仗衛如常儀制曰王者祇敬宗祧統臨寰宇必順體元之典特新制義之文朕以眇躬獲承丕構襲三百年之休運繼二十聖之耿光馭朽納隍夕惕之心罔怠法天師古日躋之道惟勤今則載戢干戈渾同書軌荷玄穹之睠祐契兆庶之樂推檢玉泥金非敢期于薄德耕田鑿井誠有慕于前王將陳享謁之儀卽備郊丘之禮宜更稱謂

永耀簡編今改名爲宣凡在中外宜體朕懷宣制訖百

寮稱賀有司告郊廟社稷

案楊文公談苑云唐時避諱最重人君卽位多更名後唐

尙沿其例明宗初名嗣源後改名亶于是楊檀改稱光遠其金壇及檀州諸州縣皆從改更則并偏旁字面亦改之當時明宗在御臣下避諱之嚴如此今考薛史楊光遠傳云初名檀唐天成中以明宗改御名爲亶始改名光遠與談苑合然閔帝紀尙稱檀北都護楊檀在天成中未嘗改名又明宗紀前後皆稱檀州則地名亦不改疑談苑所紀不能無誤薛

史紀傳異文亦未畫一

丙辰詔端明殿學士班位宜

在翰林學士之上今後如有轉改只于翰林學士內選任先是端明殿學士班在翰林學士之下又如三館例官在職上趙鳳轉侍郎日諷宰相府移之旣而禁林序列有不可之言安重誨奏行此敕時論便之癸亥宰臣

鄭珏加特進門下侍郎兼太微宮使崇文館大學士任
園加光祿大夫門下侍郎監修國史以端明殿學士尙
書兵部侍郎馮道爲中書侍郎平章事集賢殿大學士
以太常卿崔協爲中書侍郎平章事戊辰以前鄧州節
度使劉玘卒廢朝左拾遺李同上言天下繫囚請委長
吏逐旬親自引問質其罪狀眞虛然後論之以法庶無
枉濫從之辛未皇子河中節度使從珂加同平章事以
鎮州留後檢校司徒王建立爲鎮州節度使檢校太傅
癸酉第三子金紫光祿大夫檢校司徒從厚加檢校太
保同平章事河南尹判六軍諸衛事北面副招討房知

溫奏營州界奚陁羅支內附乙亥以監門衛大將軍傅
璉爲右武衛上將軍丙子詔曰頃自本朝多難雅道中
微皆上浮華罕持廉讓其有除官蘭省命秩柏臺或以
人事相疎或以私讐見訝稍乖敬奉遽至棄捐蓋司長
之振威處君恩而何地今後應新授官朝謝後可準例
上事司長不得輒以私事阻滯其本官亦不得因遭抑
挫託故請假戊寅皇子從厚領事于河南府宰相鄭珏
已下會送非例也已卯樞密使光祿大夫檢校太保行
兵部尙書安重誨加開府儀同三司檢校太傅兼侍中
樞密使檢校太保守秘書監孔循加檢校太傅同平章

事詔崇文館依舊爲弘文館初同光中宰相豆盧革以同列郭崇韜父名弘希其意奏改之今乃復焉辛巳詔曰亂離斯久法制多隳不有舉明從何禁止起今後三京及州使職員名目是押衙兵馬使騎馬得有暖坐諸都軍將衙官使下係名糧者只得衣紫皂庶人商旅只著白衣此後不得參雜兼有富戶或投名于勢要以求影庇或希假于攝貴以免丁徭仰所在禁勘以肅奸欺二月壬午朔新羅遣使朝貢丁亥以北京皇城使李繼朗爲龍武大將軍北京都指揮使李從臻爲左衛大將軍捧聖都指揮使李從璨爲右監門衛大將軍戊子以

前北面水陸轉運招撫使守冀州刺史烏震領宣州節度使庚寅陝州節度使檢校司徒石敬瑭加檢校太傅兼六軍諸衛副使壬辰西川節度使孟知祥奏泗州防禦使充西川兵馬都監李嚴扇搖軍衆尋已處斬以潁州刺史孫岳爲耀州團練使丙申以從馬直指揮使郭從謙爲景州刺史尋令中使誅之夷其族以其首謀大逆以弑莊宗也以尙書左丞崔沂爲太子少保致仕壬寅制曰荆南節度使開府儀同三司守太尉兼尙書令南平王高季興可削奪官爵仍令襄州節度使劉訓充南面招討使知荆南行府事許州節度使夏魯奇爲副

招討使統蕃漢馬步四萬人進討以其叛故也又命湖南節度使馬殷以湖南全軍會合以東川節度使董璋充東南面招討使新授夔州刺史西方鄴爲副招討使共領川軍下峽州三面齊進

通鑑考異梓夔皆在荆南之西南而云東南面者蓋據夔

梓所向言之

甲辰兗州節度使房知溫加同平章事宋州節

度使王晏球加檢校太傅丁未以禮部尙書蕭頃爲太常卿戊申以御史大夫李琪爲右僕射以太子賓客李璘爲戶部尙書以吏部侍郎李德休爲禮部尙書以前吏部侍郎崔貽孫爲吏部侍郎以端明殿學士戶部侍郎趙鳳爲兵部侍郎依前充職庚戌詔諸道節度使男

及親嫡骨肉未沾恩命者特許上聞河南府新安縣宜
爲次赤以雍陵在其界故也辛亥以刑部侍郎歸謫爲
戶部侍郎三月壬子朔以中書舍人馬縞爲刑部侍郎
幸會節園宰相樞密使及在京節度使共進錢絹請開
宴癸丑遣供奉官賈俊使淮南甲寅以西川節度副使
李敬周爲遂州武信軍留後乙卯開府儀同三司司徒
致仕趙光逢進太保致仕仍封齊國公以武信軍節度
使李紹文卒廢朝丙辰宰相判三司任圜奏諸道藩府
請依天復三年已前許貢綾絹金銀隨其上產折進馬
之直又請選孳生馬分置監牧並從之

五代會要任圜
奏三京留守諸

道節度觀察諸州防禦使刺史每年應聖節及正至等節貢奉或討伐勝捷各進獻馬伏見本朝舊事雖以獻馬爲名多將綾絹金銀折充馬價蓋跋涉之際護養稍難因此羣方俱爲定制自今後伏乞除蕃部進駝馬外諸州所進馬許依天復三年已前事例隨其土產折進價直冀貢輸之稍易又誠敬之獲申兼欲于諸處揀孳生馬準舊制分置監牧仍太常丞段顥請國學五經博委三司使別具制置奏聞

士各講本經以申橫經齒胃之義從之庚申以前澤潞節度使檢校太傅兼侍中孔勅爲河陽節度使壬戌幸甘水亭甲子青州節度使霍彥威加檢校太尉兼中書令以大內皇城使守饒州刺史李從璋爲應州節度使丁卯詔所在府縣糾察殺牛賣肉犯者準條科斷其自死牛卽許貨賣肉斤不得過五錢鄉村民家死牛但報

本村所由準例輸皮入官癸酉以戶部侍中知制誥盧
詹爲中書舍人夏四月辛巳朔房知溫奏前月二十一
日盧臺戍軍亂害副招討甯國軍節度使烏震尋與安
審通斬殺亂兵訖帝聞之廢朝一日贈震太傅新羅國
遣使貢方物丁亥以華州留後劉彥琮爲本州節度使
是日幸會節園宴近臣己丑以兵部侍郎崔居儉權知
尙書左丞以戶部侍郎王權爲兵部侍郎以禮部侍郎
裴皞爲戶部侍郎以翰林承旨守中書舍人李愚爲禮
部侍郎充職庚寅御史臺奏今月三日廊下食百官坐
定兩省官方來自五品下輒起詔曰每赴廊餐如對御

宴若行私禮是失朝儀各罰半月俸

五代會要長興三年五月詔文武兩

班每遇入閣賜食從前御史臺官及諸朝官皆在敷政門外兩廊食惟北省官于敷政門內別坐既爲隔門各不相見致行坐不齊難于肅整今後每遇入閣賜食北省官亦宜于敷政門外東廊下設席以北首爲上待班齊一時

詔盧臺亂軍龍旌所部鄴都奉節等九指揮三

千五百人在營家口骨肉並可全家處斬龍旌所部之

眾卽梁故魏博節度使楊師厚之所招置也皆天下雄

勇之士目其都爲銀鎗効節僅八千人師厚卒賀德倫

不能制西迎莊宗入魏從征河上所向有功莊宗一統

之後雖數頒賚而驕縱無厭同光末自貝州劫趙在禮

據有魏博及帝纘位在禮冀脫其禍潛奏願赴朝覲遂

除皇子從榮爲帥乃令北禦契丹是行也不支甲冑唯
幟于長行表隊伍而已故俛首遄征在途聞李嚴爲孟
知祥所害以爲劍南阻絕互相煽動及屯于盧臺會烏
震代房知溫爲帥轉增浮說震與房知溫博于東寨日
亭午大譟于營外知溫上馬出門爲甲士所擁且曰不
與兒郎爲主更何處去知溫給之曰馬軍皆在河西步
卒獨何爲也遂得躍馬登舟濟于西岸安審通戢騎軍
不動知溫與審通謀伺便攻之令亂兵卷甲南行騎軍
徐進部伍嚴整叛者相顧失色列炬宵行疲于荒澤遲
明潛令外州軍別行知溫等遂擊亂軍橫尸于野餘眾

復趨舊寨至則已焚之矣翌日盡戮之脫于叢草溝塍者十無二三迨夜竄于山谷稍奔于定州及王都之敗乃無噍類矣癸巳兗州節度使房知溫加侍中齊州防禦使安審通加檢校太傅並賞盧臺之功也丁酉僞吳楊溥遣移署右威衛將軍雷現貢端午禮幣辛丑以前利州節度使張敬詢爲雲州節度使遣樞密使孔循赴荆南城下時招討使劉訓有疾故也甲辰以戶部侍郎韓彥暉爲秘書監是日幸石敬瑭安重誨第丙午故振武節度使李嗣恩贈太尉以司封郎中充樞密院直學士閻至爲左諫議大夫充職右諫議大夫梁文矩上言

平蜀以來軍人剽略到西川人口甚多骨肉阻隔恐傷和氣請許收認帝仁慈素深因文矩之奏詔河南河北舊因兵火擄隔者並從識認是日郢州進白鵲五月癸丑以福建留後檢校太傅舒州刺史王延鈞爲檢校太師守中書令充福建節度使瑯琊郡王以太常卿蕭頤爲吏部尙書是日懷州進白鵲戊午以三司副使守太子賓客張格卒廢朝以翰林學士駕部郎中知制誥竇夢徵爲中書舍人充職癸亥遣宣徽使張延朗調發郡縣糧運赴荆南城下仍以軍法從事以右龍武統軍崔公實爲左龍武統軍以前復州刺史高行周爲右龍武

統軍割果州屬郡乙丑僞吳楊溥貢新茶滄州進白鶴
庚午詔罷荆南之師旣而令軍士散掠居民而廻詔文
武臣寮及諸道節度使刺史有父母在者各與恩澤宰
臣任圜表辭三司事乃以樞密院承旨孟鵠充三司副
使權判六月壬午華州邢州進兩岐麥兗州進三足烏
丙戌宰相任圜落平章事守太子少保丁亥詔天下除
併無名額寺院以宣徽北院使張延朗爲右武衛大將
軍判三司依前宣徽使檢校司徒辛卯大理少卿王鬱
上言凡決極刑準敕合三覆奏近年以來全隳此法伏
乞今後決前一日許一覆奏從之王辰南面招討使知

荊州南行府事襄州節度使檢校太傅劉訓責授檢校
右僕射守檀州刺史訓南征無功故有是譴詔喪葬之
家送終之禮不得過度乙未戶部尚書李璘上言請朝
班自四品以上官各許薦令錄兩人五品官各薦簿尉
兩人案五代會要作五品六品官各許薦簿尉兩人原本疑脫六品二字功過賞罰與舉
者同之詔從之其所舉人仍于官告內標所舉姓名或
有不公案原本脫公字今從五代會要增入連坐舉主仍令三品已上各
舉堪任兩使判官者丙申以天策上將軍湖南節度使
開府儀同三司檢校太師守尚書令楚王馬殷爲守太
師尚書令封楚國王庚子幸白司馬陂祭突厥神從北

俗之禮也秋七月庚戌朔以宋州節度使王晏球充北面行營副招討使癸丑以左金吾將軍烏昭遠爲左衛上將軍充入蠻國信使中書奏馬殷封楚國王禮文不載國王之制請約三公之儀用竹冊從之壬戌西川節度副大使知節度事孟知祥加檢校太尉兼侍中東川董璋加爵邑以左効義指揮使元習爲資州刺史右効義指揮使盧密爲雅州刺史癸亥幸冷泉宮甲子以檢校工部尙書謝洪爲宿州團練使夔州刺史西方鄴奏殺敗荆南賊軍收峽內三州丙寅升夔州爲甯江軍以鄴爲節度使戊辰詔曰頃因本朝親王遙領方鎮遂有

副大使知節度事年代已深相沿未改其東川西川今
後落副大使只云節度使庚午遂州留後李敬周鄜州
留後劉伸殷並正授本州節度使壬申兗州節度使房
知溫移鎮徐州徐州節度使安元信移鎮襄州滄州節
度使趙在禮移鎮兗州以齊州防禦使安審通爲滄州
節度使是日詔陵州合州長流百姓豆盧革韋說等宜
令逐處刺史監賜自盡其骨肉並放逐便是日逐段凝
于遼州劉訓于濮州溫韜于德州甲戌太子少保任圜
上表乞致仕仍于外地尋醫詔從之丁丑以左金吾大
將軍曹廷隱爲齊州防禦使八月己卯朔日有食之辛

已以右諫議大夫孔昭序爲給事中以秘書少監崔德
爲右諫議大夫壬午以右驍衛大將軍劉衡爲左領衛
上將軍以鄴都副留守趙敬怡爲右衛上將軍判興唐
府事乙酉昆明大鬼主羅殿王普露靜王九部落各差
使隨牂牁清州八郡刺史宋朝化等一百五十三人來
朝進方物各賜官告繒綵銀器放還蕃丙戌以御史中
丞盧文紀爲工部尙書以左諫議大夫梁文矩爲御史
中丞鄧州留後陶玘貶嵐州司馬以其爲內鄉縣令盛
歸仁所訟稅外科率故也仍賜歸仁緋袍魚袋癸巳幸
皇子從榮第宣禁中伎樂觀宴從榮進馬及器幣帝因

以伎樂賜之華州上言渭河泛濫害稼丁酉以吏部郎中襲文宣公孔邈爲左諫議大夫史館修撰趙熙上言應內中宮事及詔書奏對應不到中書者請委內臣一人抄錄月終送史館詔差樞密直學士錄送青州進芝草新州奏契丹乞置互市癸卯汴州節度使朱守殷加兼侍中鄆州節度符習加檢校太尉甲辰皇子從榮娶鄆州節度使劉仲殷女是夕禮會百寮表賀九月辛亥義武軍節度使檢校太尉兼中書令王都加食邑實封幽州節度使趙德鈞加檢校太尉鎮州節度使王建立加同平章事僞吳楊溥遣使以應聖節貢獻己未以前

雲州節度使高行珪爲鄧州節度使是日出御札曰歷代帝王以時巡狩一則遵于典禮一則按察方區矧彼夷門控茲東夏當先帝戡平之始爲眇躬殿守之邦俗尙貞純兵懷忠勇自元臣鎮靜庶事康和兆民咸樂于有年闔境彌堅於望幸事難違衆義在省方朕取十月七日親幸汴州庚申以衛尉卿李延光爲大理卿北京留守李彥超上言先父存審本姓符氏蒙武皇賜姓乞却還本姓從之乙丑夏州節度使李仁福鳳翔節度使李從暉朔方節度使韓洙並加食邑改賜功臣以汝州防禦使趙延壽爲河陽節度使以比部郎中知制誥劉

贊爲中書舍人以河陽掌書記程遜爲比部員外郎知
詔以代州刺史李德珙爲蔚州刺史丙寅樞密使孔循
兼東都留守襄州夏魯奇上言荆南高季興遣使持書
乞修貢奉詔魯奇不納詔諸州錄事參軍不得兼使府
賓職己巳鄧州節度使史敬銘加檢校太保同州節度
使盧質加檢校司徒御史臺奏每遇入閣舊例只一員
侍御史在龍墀邊祇候彈奏公事或有南班失儀點檢
不及今欲依常朝例差殿中侍御史二員押鐘鼓樓位
仍各綴供奉班出入從之以青州節度使副使淳于晏
爲亳州團練使契丹遣使摩琳孟袞

舊作梅老設
骨今改正

已下

朝貢戊寅西川奏據黎州狀雲南使趙和于大渡河南
起舍一間留信物十五籠并雜牋詩一卷遞至闕下冬
十月己卯朔帝御文明殿視朝癸未亳州刺史李鄴貶
郴州司戶又貶崖州長流百姓所在賜自盡判官樂文
紀配祁州責其違法贖貨也乙酉駕發西京詔留宰相
崔協以奉祠祭丁亥帝宿于滎陽汴州朱守殷奏都指
揮使馬彥超謀亂已處斬訖戊子次京水知朱守殷反
帝親統禁軍倍程前進翌日至汴州攻其城拔之守殷
伏誅丙申磁州刺史藥縱之上言今月十二日供奉官
王仁鎬至稱制殺太子少保致仕任圜契丹遣使持書

求碑石欲爲其父表其葬所戊戌詔曰諸道州府自同
光三年已前所欠秋夏稅租并主持務局敗闕課利并
沿河舟船折欠天成元年殘欠夏稅並特與除放時重
誨旣構任圖之禍恐人非之思沛恩于眾以掩已過乃
奏曰三司積欠約二百萬貫虛係賑額請並蠲放帝重
違其意故有是詔時議者以蠲隔年之賦猶或惠民場
院課利一概除之得不啟奸倖之門乎已亥詔曰太子
少保致仕任圖早推勲舊曾委重難旣退免于劇權俾
優閑于外地而乃不遵禮分潛附守殷緘題罔避于嫌
疑情旨頗彰于怨望自收汴壘備見蹤由若務含弘是

孤典憲尙全大體止罪一身已令本州私第自盡其骨肉親情僕使等並皆放罪辛丑詔曰后來其蘇動必從于人欲天監厥德靜宜布于國恩近者言幸浚郊暫離洛邑蓋逢歲稔共樂時康不謂奸臣遽彰逆狀爲厲之階旣甚覆宗之禍自貽以致近輔生靈遭此多端紛擾永言軫惻無綴寐興宜覃雨露之恩式表雲雷之澤應汴州城內百姓旣經驚劫宜放二年屋租諸處有曾受逆人文字者隨處焚毀應天下禁囚徒除十惡五逆殺人放火劫盜合造毒藥官典犯贓僞行印信屠牛外罪無輕重並從釋放應有民年八十已上及家長者有廢

疾者免一丁差役云以山南西道節度使張筠爲西京
留守行京兆尹青州節度使霍彥威差人走馬進箭一
對賀誅朱守殷帝却賜彥威箭一對傳箭蕃家之符信
也起軍令衆則使之彥威本非蕃將以臣傳箭于君非
禮也癸卯以權知汴州事陝州節度使石敬瑭爲汴州
節度使兼六軍諸衛副使侍衛親軍馬步都指揮使鳳
翔奏地震丙午威武軍節度副使檢校太尉守建州刺
史王延宣加同平章事守建州刺史充奉國軍節度副
使兼威武軍節度副使詔割施州却屬黔南十一月己
酉帝祭蕃神于郊外庚戌以皇城使行袁州刺史李從

敏爲陝州節度使乙卯青州霍彥威鄆州符習來朝以太子詹事溫輦爲吏部侍郎徐州房知溫來朝戊午黔南節度使李紹義加檢校太保庚申皇子河中節度使檢校太保同平章事從珂鄴都留守檢校太保同平章事從榮河南尹判六軍諸衛事檢校太保同平章事從厚並加檢校太傅進爵邑貝州刺史竇廷琬上言請制置慶州青白兩池逐年出絹十萬疋米萬石詔升慶州爲防禦所以廷琬爲使壬申詔霍彥威等歸蕃詔太宗朝左僕射李靖可冊贈太保鄭州僕射陂可改爲太保陂時議者以僕射陂者後魏孝文帝賜僕射李冲故因

以爲名及是命之降以爲李靖蓋誤也契丹遣使摩琳

舊作梅老
今改正

等來乞通和十二月戊寅朔以前鳳翔留後

高允貞爲右監門大將軍詔以施州爲夔州屬郡以其
便近故也遣飛勝指揮使于契丹賜契丹主錦綺銀器
等兼賜其母繡被纓絡己卯蔚州刺史周令武得代歸
闕帝問北州事令武奏曰山北甚安諸蕃不相侵擾鴈
門已北東西數千里斗粟不過十錢帝悅顧謂左右曰
須行善事以副天道居數日帝延宰臣于元德殿言及
民事馮道奏曰莊宗末年不撫軍民惑于聲樂遂致人
怨國亂陛下自膺人望歲時豐稔亦消化所致也更願

居安思危帝然之許州地震庚辰皇子鄴都留守從榮
移鎮太原以北京留守符彥超爲潞州節度使乙酉以
彰國軍節度使李從璋昧于政理詔歸闕敕新及第進
士有聞喜宴逐年賜錢四十萬己丑兗州節度使趙在
禮來朝詔出潛龍宅米以贈百官壬辰以太傅致仕齊
國公趙光逢卒輟朝丙申許州節度使夏魯奇移鎮遂
州庚子幸石敬瑭公署及康義誠私第甲辰狩于東郊
獵也丙午追尊四廟以應州舊宅爲廟

永樂大典卷七
千一百六十四

舊五代史卷三十八終

舊五代史卷三十八攷證

唐明宗紀四遣供奉官賈俊使淮南 賈俊九國志作

賈進攷冊府元龜所引薛史亦作俊今仍其舊

房知溫奏前月二十一日盧臺戍軍亂害副招討甯國
軍節度使烏震尋與安審通斬殺亂兵訖 案五代
春秋盧臺戍軍亂房知溫討平之據是書房知溫傳
及通鑑知溫初誘戍軍爲亂繼恐事不濟乃與安審
通謀討亂兵也五代春秋所書殊非事實

所舉姓名或有不公 案原本脫公字今據五代會要
增入

夔州刺史西方鄴奏殺敗荆南賊軍收峽內三州 案
通鑑六月西方鄴敗荆南水軍于峽中復取夔忠萬
三州是書繫七月甲子蓋以奏聞之日爲據歐陽史
與是書同

詔陵州合州長流百姓豆盧革韋說等宜令逐處刺史
監賜自盡 案五代春秋作元年七月殺豆盧革韋
說攷歐陽史元年七月貶豆盧革爲辰州刺史韋說
歙州刺史甲申流革于陵州說于合州二年七月殺
豆盧革韋說與是書同五代春秋統繫于元年誤也
今月十二日供奉官王仁鎬至稱制殺太子少保致仕

任圖 案安重誨害任圖五代春秋及通鑑俱不書
日歐陽史作乙未殺太子少保致仕任圖據是書作
十二日是年十月爲己卯朔十二日乃庚寅也與歐
陽史異日

美稜瑪古舊作梅老沒骨今改 摩琳舊作梅老今改

舊五代史卷三十八攷證

舊五代史卷三十九

宋司空同中書門下平章事薛居正等撰

明宗紀第五

唐書十五

天成三年春正月戊申朔帝御崇元殿受朝賀仗衛如式辛亥前河陽節度使檢校太傅兼侍中孔勅以太子太傅致仕癸丑詔取今月十七日幸鄴都甲寅以國子祭酒朱守素卒廢朝丙辰以鎮南軍節度使袁建豐卒廢朝詔贈太尉丁巳詔曰朕聞堯舜有恤刑之典貴務好生禹湯申罪己之言庶明知過今月十七日據巡檢軍使渾公兒口奏稱有百姓二人以竹竿習戰鬪之事

朕初聞奏報實所不容率爾傳宣令付石敬瑭處置今
旦重誨敷奏方知悉是幼童爲戲載聆讜議方覺失刑
循揣再三愧惕非一亦以渾公兒誑誣頗甚石敬瑭詳
覆稍乖致人枉法而殂處朕有過之地今減常膳十日
以謝幽冤其石敬瑭是朕懿親合施極諫旣茲錯誤宜
示省循可罰俸一月渾公兒決脊杖二十仍銷在身職
銜配流登州小兒骨肉賜絹五十匹粟麥各百石便令
如法埋葬兼此後在朝及諸道州府凡有極刑並須子
細裁遣不得因循百寮進表稱賀己未中書門下奏國
子祭酒望令宰相兼判乃詔崔協判之

五代會要載原
奏云祭酒之資

歷朝所貴爰從近代不重此官況屬聖朝方勤庶政辛
須宏雅道以振時風望令宰臣一員兼判國子祭酒

西以前潞州節度使毛璋爲右金吾上將軍以左驍衛

上將軍華溫琪爲右金吾大將軍以春州刺史張虔釗

爲鄭州防禦使契丹陷平州詔應廟諱文字只避正文

其偏旁文字不用虧缺點畫契丹遣使特蘇巴摩琳舊作

充納悲梅等貢獻帝遣指揮使奔托山押國信賜契丹

主妻戊辰以隨駕馬軍都指揮使富州刺史康義誠兼

領鎮南軍節度使以隨駕步軍都指揮使潮州刺史楊

漢章遙領甯國軍節度使中書上言舊制遇二月十五

日立元皇帝降聖節休假三日準會昌元年二月敕休

假一日請準近敕從之吐蕃野利延孫等六人廻鶻米里都督等四人並授歸德懷遠將軍放還蕃庚午冊贈故瀛州刺史李嗣頽爲太尉壬申冊贈故皇子檢校司空從諲爲太保甲戌制以楚國夫人曹氏爲淑妃以韓國夫人王氏爲德妃仍令所司擇日冊命二月丁丑朔有司上言太陽合虧旣而有雲不見羣官表賀詔巡幸汴京事宜停庚辰僞吳楊溥遣使貢獻賀誅朱守殷帝以荆南拒命通連淮夷不納其使遣還壬午以光祿卿韋寂卒廢朝贈禮部尙書癸未工部尙書盧文紀貶石州司馬員外安置文紀私諱業時新除于鄴爲工部郎

中舊例寮屬名與長官諱同或改其任文紀素與宰相
崔協有隙故中書未議改官于鄴授官之後文紀自請
連假鄴尋就位及差延州官告使副未行文紀參告且
言候鄴廻日終請換曹鄴其夕自經而死故文紀貶官
以倉部郎中何澤爲吏部郎中獎伏閣諫巡幸鄴都也
丁亥天德軍節度使郭彥豐加檢校司徒辛卯以山南
西道節度使張筠爲左驍衛上將軍詔中外羣臣父母
亡沒者並與追封贈癸巳以禮部尙書崔貽孫卒輟朝
甲午以吐渾寧朔奉化兩府都知兵馬使李紹魯爲吐
渾寧朔府都督乙未以樞密使兼東都留守孔循爲許

州節度使兼東都留守鄧州節度使高行珪移鎮安州
應州節度使李從璋移鎮滑州節度使盧文進移鎮鄧
州丁酉以賁授檀州刺史劉訓爲右龍武大將軍己亥
趙鵬可汗行喻遣都督李阿三等貢獻壬寅以左金吾
大將軍羅周敬爲同州節度使甲辰以威塞軍節度使
張廷裕卒廢朝詔贈太保以耀州團練使孫岳爲閬州
團練使以左監門上將軍高允貞爲右金吾衛大將軍以
右金吾衛大將軍華溫琪爲左金吾衛大將軍三月丁
未朔以久雨詔文武百辟極言時政得失丁巳以邢州
節度使王景戡爲華州節度使以前北京副留守李從

溫爲邢州節度使己未以宰臣鄭珏爲開府儀同三司
左僕射致仕加食邑五百戶庚辰以前復州刺史翟章
爲新州威塞軍留後中書奏孟夏薦饗合宰相行事在
朝只有宰相二員今東都留守孔循帶平章事宜令攝
太尉行事孔循稱使相有戎機不司祠祭重事癸亥以
前鎮州節度使王建立爲右僕射兼中書侍郎平章事
集賢殿大學士判三司西方鄴上言收復歸州以前鄭
州刺史楊漢賓爲洋州武定軍留後戊辰以前彰國軍
節度副使陳臯爲鳳州武興軍留後以前蔡州刺史孫
漢韶爲應州彰國軍留後以宣徽南院使范延光爲樞

密使以宣徽北院使判三司張延朗爲宣徽南院使以
前冀州刺史婁繼英爲耀州團練使以懷州刺史張廷
蘊爲金州防禦使己巳命范延光權知鎮州軍府事西
方鄴奏于歸州殺敗荆南賊軍太白山道士解元龜自
西川至對于便殿稱年一百一歲旣而上表乞西都留
守兼西川制置使要修西京宮闕帝謂侍臣曰此人老
耄自遠來朝方期別有異見反爲身名甚可笑也賜號
知白先生賜紫放歸山甲戌冊廻鵲可汗仁喻爲順化
可汗夏四月戊寅以汴州節度使石敬瑭爲鄴都留守
充天雄軍節度使加同平章事以樞密使權知鎮州軍

府事檢校太保范延光爲鎮州節度使兼北面水陸轉運使以司農卿鄭續爲太僕卿壬午夔州節度使東南面副招討使西方鄴加檢校太保甲申皇第三女石氏封永甯公主第十三女趙氏封興平公主仍令所司擇日冊命幽州上言契丹有書求樂器乙酉韃靼遣使朝貢以隨駕馬軍都指揮使康義誠爲侍衛親軍馬步軍都指揮使丙戌樞密使安重誨兼河南尹以皇子河南尹判六軍諸衛事從厚爲汴州節度使判六軍如故丁亥復州奏湖南大破淮賊于道人磯以西川馬步軍都指揮使趙廷隱兼漢州刺史從孟知祥之請也

九國志
趙廷隱

傳知祥至蜀康延孝陷漢州遣延隱率兵擊破之擒延孝檻送闕下知祥奏加檢校司空漢州刺史遂留屯成都洋州上言重開入蜀舊路三百餘里比今官路較二

十五程而近癸巳殿中少監石知納貶憲州司戶坐扇

惑軍鎮也北面副招討宋州節度使王晏球以定州節

度使王都反狀聞

案遼史作三月王都以定州來歸五代春秋及通鑑並從薛史作四月

庚子制義武軍節度使檢校太尉兼中書令太原王王

都削奪官爵壬寅以王晏球爲北面行營招討使知定

州行軍州事以滄州節度使兼北面行營馬軍都指揮

使安審通爲副招討使兼諸道馬軍都指揮使以左散

騎常侍蕭希甫兼判大理卿事西京奏前樞密使張居

翰卒五月乙巳朔廻鶻可汗仁喻封順化可汗丁未鄴都留守天雄軍節度使石敬瑭河陽節度使趙延壽並加駙馬都尉以右僕射李琪爲太子少傅辛亥沙州節度使曹義金加爵邑王晏球上言收奪得定州北西二關城癸丑湖南馬殷奏二月中大破淮寇二萬生擒將士五百人中書上言諸道薦人宜酌定員數今後節度使每年許薦二人帶使相者許薦三人團練防禦使各一人節度觀察判官並聽指授書記以下卽許隨府從之以六軍判官尙書司封郎中史圭爲右諫議大夫充樞密直學士詔州縣官以三十月爲考限刺史以二十

五月爲限以到任日爲始己未幽州奏契丹塔納

舊作禿餒

今改正

領二千騎西南趨定州以前同州節度使盧質行

兵部尙書判太常卿事辛酉以天雄軍節度副使判興唐府事趙敬怡爲樞密使詔曰上柱國勲之極也近代以來文臣官階稍高便授柱國歲月未深便轉上柱國武資初官便授上柱國今後凡加勲先自武騎尉十二轉方授上柱國永作成規不令踰越丁卯鎮州奏今月十八日王師不利于新樂壬申王晏球奏今月二十一日大破定州賊軍及契丹于曲陽斬獲數千人王都與塔納以數十騎復入于定州己卯以右金吾上將軍毛

璋爲左金吾上將軍以前安州節度使史敬銘爲右金
吾上將軍以前華州節度使劉彥琮爲左武衛上將軍
壬午放內園鹿七頭于深山乙酉皇子故金槍指揮使
檢校左僕射從璟贈太保己丑幽州趙德鈞奏殺契丹
千餘人于幽州東獲馬六百匹壬辰宰臣馮道率百寮
上表請上尊號曰聖明神武文德恭孝皇帝詔報不允
丙申馮道等再上尊號不允戊戌以西京副留守知留
守事張遵誨行京兆尹秋七月乙巳詔故僞蜀主王衍
追封順正公以諸侯禮葬丙午以前武信軍節度使李
敬周爲邠州節度使丁未以滄州節度使安審通卒于

師輟朝壬子以朔方節度使韓洙卒廢朝甲寅王晏球奏六月二十二日進攻逆城將士傷者三千人時晏球知城中有備未欲急攻朱宏昭張虔釗切于立功促攻賊壘晏球不得已而進兵遂致傷痍者衆乙卯以太子少保李茂勳卒輟朝己未詔弛薊禁許民間自造于秋苗上徵納麴價畝出五錢時孔循以麴法殺一家于洛陽或獻此議以爲愛其人便于國故行之宗正卿李紆除名刑部侍郎馬縞貶綏州司馬刑部員外郎李愼儀貶階州司戶初李紆差攝陵臺令張保嗣等各虛稱試衡爲奉先令王延朗所訟大理寺斷以詐假官論刑部

詳覆稱非假詐大理執之召兩司廷議刑部理屈故有
是貶紆續敕配隴州徒一年未幾詔曰天下州府例是
攝官皆結試銜或因勘窮便關詐假已前或有稱試銜
一切不問此後並宜禁止曹州刺史成景宏貶綏州司
戶參軍續敕長流宥州尋賜自盡坐受本州倉吏錢百
緡也王戊齊州防禦使曹廷隱以奏舉失實配流永州
續敕賜自盡甲子王晏球奏今月十九日契丹七千騎
來援定州王師逆戰于唐河北大破之案通鑑王戊王晏球破契丹于
唐河北甲子追至易州戊辰福建節度使王延鈞可依
所推長曆與薛史異前檢校太師守中書令進封閩王己巳王晏球奏此月

二十一日追契丹至易州掩殺四十里擒獲甚衆故朔方節度使韓洙贈太尉以兵部侍郎王權御史中丞梁文矩並爲吏部侍郎以左諫議大夫呂夢奇爲御史中丞八月癸酉朔以翰林學士守中書舍人李懌劉昫並爲戶部侍郎充職以吏部侍郎劉岳守秘書監以吏部侍郎韓彥憚守禮部尙書以戶部侍郎歸藹守太子賓客以戶部侍郎裴皞守兵部侍郎以中書舍人張文寶守刑部侍郎詔凡有姓犯廟諱者以本望爲姓丁丑以檢校尙書右僕射守龍武大將軍劉訓爲晉州節度使檢校太傅壬午幽州趙德鈞奏于府西邀殺契丹敗黨

數千人生擒首領特哩袞

舊作惕隱今改正

等五十餘人是時

官軍襲殺契丹屬秋雨繼降泥滓莫進人饑馬乏散投

村落所在村民持白梃毆殺之德鈞出兵接于要路幾

無噍類帝致書喻其本國

案通鑑作八月壬戌趙德鈞邀擊契丹據薛史八月係癸

酉朔不得有壬戌疑通鑑誤

辛卯以朔方軍留後韓璞爲朔方軍節

度使靈武雄警甘肅等州觀察使檢校司徒帝聞隨鄧

復郢均房之民父母骨肉有疾以長竿遙致粥食而餉

之出嫁女夫家不遣來省疾乃下詔委長吏嚴加禁察

房州奏新開山路四百里南通夔州畫圖以獻以前洋

州節度使戴思遠爲太子太保致仕庚子詔今後翰林

學士入院以先後爲班次承旨一員不計官資先後在學士之上閏月丁未兩浙節度觀察留後清海軍節度使檢校太師兼中書令錢元瓘可杭州越州大都督府長史充鎮東鎮海等軍節度使戊申趙德鈞獻戎俘于闕下其蕃將特哩袞等五十人留于親衛餘契丹六百人皆斬之乙卯升楚州爲順化軍以明州刺史錢元珦爲本州節度使以吏部尙書蕭頃爲太子少保契丹遣使來貢獻契丹平州刺史張希崇歸順乙丑陝州節度使李從敏移鎮滄州以宣徽南院使張延朗爲陝州節度使詔在京遇行極法日宜不舉樂兼減常膳諸州遇

行極法日禁聲樂己巳滑州掌書記孟昇匿母服大理
寺斷處流特敕孟昇賜自盡觀察使觀察判官錄事參
軍失其糾察各行殿罰襄邑縣民聞威父爲人所殺不
雪父冤有狀和解特敕處死是月二十七大水河水溢
絳州地震九月乙亥以捧聖左右廂副都指揮使索自
通爲雲州節度使丁丑以太府卿判四方館事李郁爲
宗正卿壬午以晉州節度使安崇阮爲左驍衛上將軍
甲申吐蕃廻紇各遣使貢獻壬辰宰臣王建立進玉杯
上有文曰傳國萬歲杯乙未詔德州流人溫韜遼州流
人段凝嵐州司戶陶玘憲州司戶石知納原州司馬聶

嶼並宜賜死于本處暴其宿惡而誅之也丙申以邠州
節度使梁漢顒爲右威衛上將軍丁酉河陽節度使駙
馬都尉趙延壽爲檢校司徒己亥詔徐州節度使房知
溫兼荆南行營招討使知荆南行府事冬十月甲辰制
瓊華長公主孟氏可冊爲福慶長公主丙午以滄州節
度使李從敏兼北面招討使戊申帝臨軒命禮部尙書
韓元勳工部侍郎任贊往應州奉冊四廟詔邠州節度
使李敬周攻慶州以刺史竇廷琬拒命故也戊午契丹
平州刺史張希崇已下八十餘人見于元德殿頒賜有
差突厥首領張慕進等來朝貢甲子安州節度使高行

珪奏屯駐左神捷左懷順軍士作亂已逐殺出城詔升
壽州爲忠正軍戊辰以雲州節度使索自通領壽州節
度使以前雲州節度使張溫復爲雲州節度使庚午夜
西南有彗星長丈餘在牛星五度十一月癸酉日南至
帝御崇元殿受朝賀甲戌捧聖指揮使何福進招收到
安州作亂兵士五百人自指揮使已下至節級四十餘
人並斬餘衆釋之壬午房知溫奏荆南高季興卒中書
舍人劉贊奏請節度使及文班三品已上謝見通喚從
之是日以契丹所署平州刺史光祿大夫檢校太保張
希崇爲汝州刺史加檢校太傅己丑中書奏今後或有

封冊請御正衙從之青州奏節度使霍彥威卒輟朝三日詔宰臣王建立權知青州軍州事庚寅禮部員外郎和凝奏應補齋郎並須引驗正身以防僞濫舊例使蔭一任官補一人今後改官須轉品即可如無子許以親姪繼限念書十卷試可則補從之甲午以尙書左僕射同平章事集賢殿大學士判三司王建立爲青州節度使檢校太尉同平章事丙申帝謂侍臣曰古鐵券如何趙鳳對曰帝王誓文許其子子孫孫長享爵祿帝曰先朝所賜唯朕與郭崇韜李繼麟三人爾崇韜繼麟尋已族滅朕之危疑慮在旦夕于是嗟嘆久之趙鳳曰帝王

執信故不必銘金鏤石矣吏部郎中何澤奏流外官請
不試書判之類從之吐蕃遣使朝貢戊戌前安州節度
副使范延榮并男皆斬于軍巡獄爲高行珪誣奏故也
十二月壬寅朔詔眞定府屬縣宜準河中鳳翔例升爲
次畿眞定縣升爲次赤甲辰邠州節度使李敬周奏收
下慶州刺史竇廷琬族誅

永樂大典卷七
千一百六十四

舊五代史卷三十九終

舊五代史卷三十九攷證

唐明宗紀五契丹陷平州 案契丹陷平州歐陽史作

丁巳通鑑不書曰攷平州自梁開平中劉守光以賂契丹天成元年盧文進舉其地以歸于唐至三年復爲遼人所取自是平州遂屬于遼宋人論石晉賂遼故地兼及平州蓋未詳攷今附識于此

爲左驍衛上將軍 案通鑑作左衛上將軍歐陽史從是書作左驍衛

巳亥回鶻可汗仁喻遣都督李阿爾珊等貢獻 案李阿爾珊來貢歐陽史作戊戌

北面副招討宋州節度使王晏球以定州節度使王都反狀聞 案遼史王都以定州來歸作三月事五代春秋及通鑑並從是書作四月

壬戌齊州防禦使曹廷隱以奏舉失實配流永州續勅賜自盡 案歐陽史作己未殺齊州防禦使曹廷隱己未在壬戌前三日不應發配在後賜死轉在前也 歐陽史疑訛

壬午幽州趙德鈞奏于府西邀殺契丹 案通鑑作八月壬戌趙德鈞邀擊契丹據是書八月係癸酉朔不得有壬戌疑通鑑誤

邠州節度使李敬周 李敬周通鑑作李敬通是書前
後並作敬周歐陽史亦作敬周疑通鑑傳刻之訛
以刺史竇廷琬拒命故也 案竇廷琬反通鑑從是書
作十月歐陽史繫于十月以前與是書異

突厥首領張慕進等來朝貢 慕進歐陽史作慕晉
壬午房知溫奏荆南高季興卒 案高季興卒通鑑作
十二月丙辰詳見通鑑攷異

檢校太保張希崇爲汝州刺史 案歐陽史作汝州防
禦使通鑑從是書作刺史

托諾巴摩哩舊作禿納悲梅老今改 伊埒雅遜舊作

野利延孫今改 阿爾珊舊作阿山今改 託諾舊
作禿餒今改 特里袞舊作惕隱今改

舊五代史卷三十九攷證

舊五代史卷四十

宋司空同中書門下平章事薛居正等撰

明宗紀第六

唐書十六

天成四年春正月壬申朔帝御崇明殿受朝賀仗衛如儀幽州節度使趙德鈞奏臣孫贊年五歲默念論語孝經舉童子于汴州取解就試詔曰都尉之子太尉之孫能念儒書備彰家訓不勞就試特與成名宜賜別敕及第附今年春榜戊子放元年應欠秋稅以左衛上將軍安崇阮爲黔南節度使壬辰迴鶻入朝使掣撥等五人各授懷化司戈放還以北京副留守馮贇爲宣徽使判

卷四十一

三司戊戌禁天下虛稱試攝銜西川孟知祥奏支屬刺

史乞臣本道自署二月乙巳王晏球奏此月三日收復

定州獲王都首級生擒契丹塔納

舊作禿餒今改正

等二千餘

人百官稱賀詔取今月二十四日車駕還東京辛亥以

北面行營招討使宋州節度使王晏球爲鄆州節度使

加兼侍中以北面行營副招討使滄州節度使李從敏

爲定州節度使以北面行營兵馬都監鄭州防禦使張

虔釗爲滄州節度使幽州節度使趙德鈞加兼侍中乙

卯以樞密使趙敬怡權知汴州軍州事丙辰邢州奏定

州送到僞太子李繼陶已處置訖辛酉帝御咸安樓受

定州俘馘百官就列宣露布于樓前禮畢以王都首級

獻于太社王都男四人弟一人塔納父子二人並磔于

市

五代會要尚書兵部宣露布于樓前宣訖尚書刑部侍郎張文寶奏曰逆賊王都首級請付所司大理卿

蕭希甫受之以出獻于郊社其時露布之文類制敕之

王都男并蕃將等磔于開封橋

體蓋執筆者誤頗爲識者所嗤樞密使趙敬怡卒贈太

傅以端明殿學士趙鳳權知汴州軍州事甲子車駕發

汴州丙寅至鄭州賜左僕射致仕鄭珏錢二十萬丁卯

宰相崔協卒詔贈尚書左僕射東都留守太子少傅李

琪等奏至偃師縣奉迎時琪奏章中有敗契丹之凶黨

破眞定之逆城之言詔曰契丹卽爲凶黨眞定不是逆

城李琪罰一月俸庚午車駕至自汴州三月甲戌馮道進表乞命相丙戌詔皇城使李從璨貶授房州司戶叅軍仍令盡命從璨帝之諸子也先是帝巡幸汴州留從璨以警大內從璨因遊會節園酒酣戲登御榻安重誨奏之故寘于法焉壬辰中書奏今後羣臣內有乞假覲省者請量賜茶藥從之乙未以前鄆州節度使符習爲汴州節度使丙申詔鄴都幽鎮滄邢易定等州管內百姓除正稅外放免諸色差配以討王都之役有輓運之勞也夏四月庚子朔禁鐵鐵錢壬寅重修廣壽殿成有司請以丹漆金碧飾之帝曰此殿經焚不可不修但務

宏壯不勞華侈湖南奏敗荆南賊軍于石首鎮詔沿邊
置場買馬不許蕃部直至闕下先是党項諸蕃凡將到
馬無駑良並云上進國家雖約其價以給之及計其館
穀賜賚所費不可勝紀計司以爲耗蠹中華遂止之壬
子以皇子北京留守河東節度使從榮爲河南尹判六
軍諸衛事以皇子河南尹判六軍諸衛事從厚爲北京
留守以河陽節度使趙延壽爲宋州節度使以侍衛親
軍都指揮使鎮南軍節度使康義誠爲河陽節度使契
丹寇雲州癸丑契丹遣紐赫美稜舊作捺括梅里今改正等來朝
貢稱取塔納等骸骨並斬于北市甲寅以端明殿學士

趙鳳爲門下侍郎兼工部尚書平章事丙辰諫議大夫致仕襲文宣公孔邈卒庚申以王建立孔循帶中書直省吏歸藩並追廻王戌幽州節度使趙德鈞兼北面行營招討使鎮州節度使范延光加檢校太傅戊辰中書奏五月一日應在京九品以上官及諸道進奉使請準貞元七年敕就位起居永爲恆式從之五月己巳朔帝御文明殿受朝丙子以夔州節度使西方鄴卒輟朝丁丑大理卿李保殷卒己卯以忠武軍節度使索自通爲京兆尹充西京留守以左威衛上將軍朱漢賓爲潞州節度使乙酉以黔州節度使安崇阮爲夔州節度使以

左驍衛上將軍張溫爲洋州節度使以黔州留後楊漢章爲本州節度使中書奉太常寺定少帝諡昭宣光烈孝皇帝廟號景宗伏以少帝今不入廟難以言宗只云

昭宣光烈孝皇帝從之

案舊唐書哀帝紀云中書奏少帝行事不合稱宗今考五代會

要天成二年博士呂明龜議引君不逾年不入宗廟之禮請別立廟于園陵故不稱景宗非議其行事有失也

舊唐書誤

丁亥以鳳州武興軍留後陳臯爲武興軍節度使

以新州威塞軍留後翟璋爲威塞軍節度使壬辰以權知尙書右丞崔居儉爲尙書右丞詔葺天下廨宇丙申襄州奏荆南高從誨乞歸順雲州奏契丹犯塞六月辛丑以左散騎常侍姚顗爲兵部侍郎壬寅夔州節度使

楊漢章移鎮雲州以北京馬步軍都指揮使兼欽州刺史張敬達爲鳳州節度使癸卯以前西京副留守事張遵誨行衛尉事充客省使國子博士田敏請葺四郊祠祭齋室丙午以沂州刺史張萬進爲安北都護充振武軍節度使戊申以宿州團練使康思立爲利州節度使登州刺史孫元停任坐在任無名科率故也詔鄴都仍舊爲魏府應魏府汴州益州宮殿悉去鴟尾賜節度使爲衙署辛亥以權知朔方軍留後定難軍都知兵馬使韓澄爲朔方留後癸丑以前潞州節度使符彥超爲左驍衛上將軍詔諸道節度使行軍司馬名位雖高或帥

臣不在其州事宜委節度副使權知又詔藩郡所請幕賓及主事親從者悉以名聞丙辰權知荆南軍府事高從誨上章首罪乞修職貢仍進銀三千兩贖罪壬戌幸至德宮詔京城空地課人蓋造如無力者許人請射營構秋七月庚午以前西京留守判官張鎰爲司農卿壬申貶前左金吾上將軍毛璋爲儒州長流百姓尋賜自盡以其在藩鎮陰蓄奸謀故也甲戌御史中丞呂夢奇責授太子右贊善大夫坐曾借毛璋馬故也已卯以工部侍郎任贊爲左散騎常侍以樞密直學士左諫議大夫充匭使閭至爲工部侍郎充職遂州進嘉禾一莖九

穗壬午以給事中判大理卿事許光儀爲御史中丞史
官上言所編修莊宗一朝事迹欲名爲實錄太祖獻祖
懿祖名爲紀年錄從之五代會要天成三年十二月史館奏據左補闕張昭遠狀嘗讀國書伏見懿祖昭烈皇帝自元和之初獻祖文皇帝于太和之際立功王室陳力國朝太祖武皇帝自咸通後來勤王戮力剪平多難頻立大功三換節旄再安京國莊宗皇帝終平大憝奄有中原倚闕編修遂成渾墜伏請與當館修撰參序條綱撰太祖莊宗實錄四年七月監修國史趙鳳奏奉敕修懿祖憲祖太祖莊宗四帝實錄自今年六月一日起手旋具進呈伏以凡關纂述務合品題承乾御宇之君行事方云實錄追尊冊號之帝約文祗可紀年所修前件史書今欲自莊宗一甲申以朝名爲實錄其太祖以上並目爲紀年錄從之一甲申以前荆南行軍司馬檢校太傅高從誨起復授檢校太傅兼侍中充荆南節度使丙戌涇州節度使李從昶移鎮

華州以冀州刺史李金全爲涇州節度使戊子中書奏
今後新及第舉人有曾授正官及御署者欲約前任資
序與除一官從之壬辰詔取來年二月二十一日有事
于南郊八月丁酉朔大理正路阮奏切見春秋釋奠于
文宣王而武成王廟久曠時祭請復常祀從之戊戌中
書奏太子少傅李琪所撰進霍彥威神道碑文不分眞
僞是混功名望令改撰從之琪梁之故相私懷感遇敘
彥威在梁歷任不欲言僞梁故也辛丑詔亂離以來天
下諸軍所掠生口有主識認卽勒還之以前清河縣令
襲鄴國公食邑三千戶楊仁矩爲秘書丞御史臺奏主

簿朱穎是前中丞奏請合隨聽罷任詔曰主簿旣爲正
秩況入選門顯自朝恩合終考限宜令仍舊守官甲辰
以宰臣馮道爲南郊大禮使兵部尙書盧質爲禮儀使
御史中丞許光義爲儀仗使兵部侍郎姚顗爲鹵簿使
河南尹從榮爲橋道頓遞使客省使衛尉卿張遵誨爲
修裝法物使乙巳黑水朝貢使骨至來朝授歸德司戈
放還蕃丁未以翰林學士承旨禮部侍郎知制誥李愚
爲兵部侍郎職如故以中書舍人盧詹爲禮部侍郎以
兵部侍郎裴皞爲太子賓客吐渾首領念公山由來朝
貢戊申服袞冕御文明殿追冊昭宣光烈孝皇帝庚戌

以宰臣兼修國史趙鳳兼判集賢院事以左散騎常侍
任贊判大理卿事己未高麗王王建遣使貢方物辛酉
詔準往例節度使帶平章事侍中中書令並列銜于敕
牒側書使字今錢鏐是元帥尙父與使相名殊馬殷守
太師尙書是南省官資不合署敕尾今後敕牒內並落
下乙卯党項首領朝貢甲子幸金真觀改賜建法大師
紫尼智願爲圓惠大師卽武皇夫人陳氏也丙寅達鞠
來朝貢京城內有南州北州乃張全義光啟中所築是
詔許人依街巷請射城壕任使平填蓋造屋宇九月丁
亥中書奏據宗正寺申懿祖永興陵獻祖長甯陵太祖

建極陵並在代州鴈門縣皇帝追尊四廟在應州金城縣詔應州升爲望州金城鴈門並升爲望縣辛酉太常博士段頤奏切見大祠則差宰相行事中祠則卿監行事小祠則委太祝奉禮並不差官今後請差五品官行事從之癸巳制天下兵馬元帥尙父吳越國王錢鏐可落元帥尙父吳越國王授太師致仕責無禮也先是上將軍烏昭遇使于兩浙以朝廷事私與吳人仍目鏐爲殿下自稱臣謁鏐行拜蹈之禮及廻使副劉致具述其事故停削鏐官爵令致仕烏昭遇下御史臺尋賜自盡後有自浙中使還者言昭遇無臣鏐之事爲致所誣人

頗以爲冤乙未詔諸道承勘兩浙綱運進奉使並下巡
獄冬十月丙申朔併吏部三銓爲一銓宜令本司官員
同商量注擬連署申奏仍不得于私第注官戊戌以襄
州兵馬都監守磁州刺史康福爲朔方河西等節度使
靈威雄警涼等州觀察使時朔方將吏請帥于朝廷故
命福往鎮之庚子以右金吾上將軍史敬鎔爲左金吾
上將軍以左驍衛上將軍符彥超爲右金吾上將軍以
前黔州節度使李承約爲左驍衛上將軍以雲州節度
使張敬珣爲右驍衛上將軍以前華州節度使王景戡
爲右驍衛上將軍癸卯太常少卿蕭愿責授太子洗馬

奪非愿南郊行事與祠官同飲詰旦猶醉不能行禮爲御史所劾也詔新授朔方節度使康福將兵萬人赴鎮已酉制復故荆南節度使高季興官爵辛亥升閬州爲保甯軍王子以內省使左衛大將軍李仁矩爲閬州節度使幸七星亭丙辰夏州進白鷹重誨奏曰夏州違詔進貢臣已止約帝曰善朝退帝密令左右進焉是日幸龍門十一月丁卯洛州水暴漲壞居人垣舍戊辰以刑部侍郎張文寶爲右散騎常侍己巳以尙書右丞李光序爲刑部侍郎癸酉升曹州濟陰縣爲次赤以昭宣光烈孝皇帝溫陵所在故也甲戌奉國軍節度使王延稟

加兼侍中從福建節度使王延鈞請也車駕出近郊試
夏州所進白鷹戒左右勿令重誨知己卯日南至帝御
文明殿受朝賀癸未秘書少監于嶠配振武長流百姓
永不齒任爲宰臣趙鳳誣奏也史官張昭遠等以新修
獻祖懿祖太祖紀年錄共二十卷莊宗實錄三十卷上
之賜器帛有差五代會要監修趙鳳修撰張昭遠呂咸休各賜緡絲銀器等十二月
丁酉靈武康福奏破野利大蟲兩族三百餘帳于方渠
獲牛羊三萬戊戌詔應授官及封贈官誥舉人冬集等
所費用物一切官破壬戌中書奏今後宰臣致齋內不
押班不知印不赴內殿起居或遇國忌行事官已受戒

誓不赴行香并不奏刑殺公事大祠致齋內請不開宴
每遇大忌前一日請不坐朝從之

永樂大典卷七
千一百六十五

舊五代史卷四十終

舊五代史卷四十攷證

唐明宗紀六贊年五歲默念論語孝經 案宋史作贊

七歲誦書二十七卷

宜賜別勅及第附今年春榜 案宋史云特賜童子及第附長興三年禮部春榜是書作天成四年春榜與宋史異

二月乙巳王晏球奏此月三日收復定州 案歐陽史作二月癸卯王晏球克定州與是書合通鑑作癸丑攷癸丑非二月三日也疑傳寫之誤

禁鐵鑪錢 鐵鑪錢通鑑作鐵錫錢攷胡三省注云馬

殷得湖南鑄錫爲錢本用之境內其後遂流入中國
疑原本鑑字誤攷冊府元龜亦作鐵鑑錢今仍其舊
以端明殿學士趙鳳爲門下侍郎兼工部尙書平章事
案歐陽史本紀作端明殿學士尙書兵部侍郎趙
鳳爲門下侍郎兼工部尙書同平章事趙鳳傳作禮
部侍郎與本紀異見吳縝纂誤

伏以少帝今不入廟難以言宗 案舊唐書哀帝紀云
中書奏少帝行事不合稱宗攷五代會要天成二年
博士呂明龜議引君不逾年不入宗廟之禮請別立
廟于園陵故不稱景宗非議其行事有失也舊唐書

誤

丙辰權知荆南府事高從誨上章首罪 丙辰通鑑作

庚申

使副劉玫 劉玫通鑑作韓玫

徹伯爾舊作掣撥今改 托諾舊作禿餒今改 紐赫

美稜舊作捺括梅里今改 郭濟舊作骨至今改

舊五代史卷四十攷證

舊五代史卷四十一

宋司空同中書門下平章事薛居正等撰

明宗紀第七

唐書十七

長興元年春正月丙寅朔帝御明堂殿受朝賀仗衛如常儀乙亥國子監請以監學生束脩及光學錢備監中修葺公用從之丙子帝謂宰臣日時雪未降如何馮道曰陛下恭行儉德憂及烝民上合天心必有春澤是夜降雪其夕右散騎常侍蕭希甫封狀申樞密稱得河堰衙官狀告本都將校二十餘人欲謀不軌至旦追問無狀斬所告人是日幸至德宮辛卯中書奏郊天有日合

差太內留守詔以宣徽南院使朱宏昭充二月戊戌幸
稻田莊已亥黑水國主兀兒遣使貢方物翰林學士劉
昉奏新學士入院舊試五題請今後停試詩賦祇試麻
制答蕃書批答共三道仍請內賜題目定字數付本院
召試從之案五代會要載劉昉原奏云舊例學士入院除中書舍人不試餘官皆先試麻制各蕃批
答各一道詩賦各一道號曰五題並於當日呈納從前每遇召試多預出五題潛令宿構其無黨援者卽日起
草罕能成功今請權停詩賦祇試有司奏皇帝致齋於
三道仍內賜題目兼定字數從之
明堂按舊服通天冠絳紗袍文武五品已上著袴褶近
例祇著朝服從之乙巳中書奏皇帝朝獻太微宮太廟
祭天地於圓丘準禮例親王爲亞獻行事受誓戒從之

以天雄軍節度使石敬瑭爲御營使壬子帝宿齋于明
堂殿癸丑朝獻太微宮是日宿齋于太廟詰旦請行饗
禮甲寅赴南郊齋宮是夜微雨三鼓後晴明如晝乙卯
祀昊天上帝於圜丘柴燎禮畢郊宮受賀是日御五鳳
樓宣制改天成五年爲長興元年大赦天下除十惡五
逆放火刼舍屠牛官典犯賊僞行印信合造毒藥外罪
無輕重咸赦除之天成四年終諸道所欠殘稅及場院
欠折並特放免羣臣職位帶平章事侍中中書令並與
改鄉名里號朝臣及藩侯郡守亡父母及父母在并妻
室未沾恩命者並與恩澤應私債出利已經倍者祇許

徵本已經兩倍者本利並放河陽管內人戶每畝舊徵
橋道錢五文今後不徵諸道州府每畝先徵麴錢五文
今特放二文云商州吏民以刺史郭知瓊善政聞詔褒
之三月丁卯幸會節園遂幸河南府靈武奏殺戮蕃賊
二千人壬申鳳翔節度使李從曦進封岐國公移鎮汴
州甲戌延州節度使高允韜移鎮邢州丙子以宣徽使
朱弘昭爲鳳翔節度使朱漢賓加檢校太傅移鎮晉州
徐州節度使房知溫移鎮鄆州鄆州節度使王晏球移
鎮青州宰臣馮道率寮拜表請上尊號曰聖明神武文
德恭孝皇帝詔報不允壬午許州節度使孔循移鎮滄

州陝州節度使張延朗移鎮許州加檢校太傅滄州節度使張虔釗移鎮徐州加檢校太保癸未詔貶右散騎常侍集賢殿學士判院事蕭希甫爲嵐州司戶參軍仍馳駟發遣坐誣告之罪也宰臣馮道等再請上尊號詔允之丙戌以侍衛親軍馬步軍都指揮使河陽節度使康義誠爲襄州節度使檢校太傅以左武衛上將軍劉彥琮爲陝州節度使檢校太保庚寅制淑妃曹氏可立爲皇后仍令擇日冊命夏四月甲午朔國子司業張溥奏請復八館以廣生徒按六典監有六學國子太學四門律學書學算學是也而溥云八館謬矣丁酉前汴州

節度使檢校太尉兼侍中符習加太子太師致仕進封
衛國公戊戌遂州節度使夏魯奇加同平章事皇子河
中節度使從珂進位檢校太尉封開國公自是諸道節
鎮皆次第加恩以郊禋覃慶澤故也已亥幸會節園壬
寅以樞密使安重誨爲留守太尉兼中書令使如故青
州節度使王建立加侍中移鎮潞州皇子河中節度使
從珂奏臣今日五日閱馬於黃龍莊衙內指揮使楊彥
溫據城叛臣尋時詰問稱奉宣命胡三省通鑑注云樞密院用宣三省用堂帖
臣見在虞鄉縣帝遣西京留守索自通侍衛步軍都
指揮使藥彥稠等攻之仍授彥溫絳州刺史冀誘而擒

之也詔從珂赴闕丁未以戶部尙書李麟爲兗州行軍
司馬坐引淮南覘人貽安重誨寶帶也戊申宰臣馮道
加右僕射趙鳳加吏部尙書乙酉以左龍武統軍劉君
鐸卒廢朝癸丑索自通藥彥稠等奏收復河中斬楊彥
溫傳首來獻初彥稠出師帝戒之曰與朕生致彥溫吾
將自訊之及收城斬首傳送帝怒彥稠等時議皆以爲
安重誨方弄權從榮諸王皆敬事不暇獨忌從珂威名
每于帝前屢言其短巧作窺圖冀能傾陷彥溫旣誅從
珂歸清化里第重誨謂馮道等曰蒲帥失守責帥之義
法當如何翌日道等奏合行朝典帝不悅趙鳳堅奏故

事有責帥之義所以激勵藩守帝曰皆非公等意也後數日帝于中興殿見宰臣趙鳳承重誨意又再論列帝默然翌日重誨復自論奏帝極言以拒之語在末帝紀中帝又曰卿欲如何制置重誨曰于陛下父子之間臣不合言一稟聖旨帝曰從佗私第間坐何煩奏也乃止以前邢州節度使檢校司徒李從溫爲左武衛上將軍丙辰以西京留守檢校司徒索自通爲河中節度使丁巳雲州奏掩襲契丹獲頭口萬計戊午帝御文明殿受冊徽號冊曰維長興元年歲次庚寅四月甲午朔二十五日戊午金紫光祿大夫守尙書左僕射兼門下侍郎

同中書門下平章事充太微宮使弘文館大學士上柱
國始平郡開國侯食邑一千五百戶食實封一百戶臣
馮道銀青光祿大夫門下侍郎兼吏部尙書同中書門
下平章事監修國史判集賢院事上柱國天水郡開國
伯食邑七百戶臣趙鳳及文武百官特進太子少傅上
柱國酒泉郡開國侯食邑一千戶臣李琪等五千八百
九十七人言臣聞天不稱高而體尊地不矜厚而形大
厚無不載高無不覆四時行于內萬物生其間總神祇
之靈叶帝王之運日出而星辰自戢龍飛而雷雨皆行
元氣和而天下和庶事正而天下正伏惟皇帝陛下天

授一德時歷多艱翊太祖以興邦佐先皇而定難拯嗣
昭于潞困救德威于燕危遏思遠而全鄴都誅彥章而
下梁苑成再造之業由四征之功洎纂鴻圖每敷皇化
去內庫而省庖膳出宮人而減伶官輕寶玉之珍却鷹
鷂之貢淳風旣洽嘉瑞自臻故登極之前人皆不足改
元之後時便有年遐荒旋斃於戎王重譯徑來于蠻子
東巡而守殷墟北討而王都殲破契丹而燕趙無虞控
靈武而瓜沙並復近以饗上元而薦太廟就吉土而配
昊天輅已降而雨霑事欲行而月見燔柴禮畢作解恩
覃帝命咸均人情普悅非陛下有道有德至聖至明動

不疑人靜惟恭已常敦孝禮每納忠言則何以臨御五
年澄清四海時久纏於災害民驟見于和平休徵備載
于簡編徽號過持于謙讓三年不允眾志皆堅天不以
上帝自崇日不以大明自貴于烝民有惠于元后同符
列聖皆然舊章斯在今以明庭百辟列土諸侯中外同
詞再三瀝懇臣等不勝大願謹奉玉寶玉冊上號曰聖
明神武文德恭孝皇帝伏惟皇帝陛下體堯舜之至道
法日月于太虛威于夷狄恩及蟲魚奉國者繼加榮寵
違天者咸就誅戮典禮當告成之後夙夜思卽位之初
千秋萬歲永混車書宰臣馮道之詞也庚申以左金吾

上將軍史敬鎔爲鄧州節度使以右金吾上將軍符彥超爲兗州節度使以驍衛上將軍張敬詢爲滑州節度使以閬中防禦使孫岳爲鳳州節度使詔改鳳翔管內應州爲匡州信州爲晏州改新州管內武州爲毅州五月乙丑鄭州防禦使張進副使咸繼威並停任以盜掠城中居人故也丙寅以少府監韋肅爲洛州刺史以潞州節度使王建立爲太傅致仕建立素與安重誨不協因其入朝乃言建立自鎮歸朝過鄴都日有扇搖之言以是罪之故令致仕丁卯以前興元節度使劉仲殷權知潞州軍州事戊辰以安州節度使高行珪卒輟朝有

司上言皇后受冊內外命婦並合奉賀今未有命婦準
例上表稱賀中書諸道節度使但進表上言皇帝外命
婦上皇后賀牋表進呈訖無報應皇親或有慶賀及起
居章表內中進呈後祇宣示來使並不合答復從之王
申以權知昭義軍軍州事劉仲殷爲潞州節度使檢校
太傅丁丑帝臨軒命使冊淑妃曹氏爲皇后禮院上言
百官上䟽于皇后曰皇后殿下及六宮及率土婦人慶
賀祇呼殿下不言皇后中書覆奏若祇呼殿下恐與皇
太子無所分別凡上中宮表章呼皇后殿下若不形文
字尋常祇呼皇后從之癸未太子少傅蕭頃卒廢朝甲

申迴鵬可汧仁裕遣使貢方物辛卯以翰林承旨兵部
侍郎李愚爲太常卿壬辰以前青州節度使李從璋爲
右驍衛上將軍六月丁酉以護駕馬軍都指揮使貴州
刺史安從進爲宣州節度使充護駕馬軍都指揮使以
護駕步軍都指揮使澄州刺史藥彥稠爲壽州節度使
兼護步軍都指揮使甲辰以皇城使安崇緒爲河陽留
後重誨子也鳳翔奏所管良晏匡三州並無屬縣請却
改爲縣從之仍舊爲軍鎮前振武節度使安金全卒王
子中書門下奏詳覆到禮部院今年及第進士李飛樊
吉夏侯珙吳泐王德柔李穀等六人望放及第其盧價

等七人及賓貢鄭朴望許令將來就試知貢舉張文寶
試上不得精當望罰一季俸從之丁巳皇子北京留守
河東節度使從厚移領鎮州以左武衛上將軍李從溫
爲許州節度使秋七月甲子以宣徽南院使行右衛上
將軍判三司馮贇爲北京留守太原尹己巳以鄧州節
度使史敬銘卒廢朝甲戌以左威衛上將軍梁漢鵬爲
鄧州節度使前兗州節度使趙在禮爲左驍衛上將軍
庚辰奉國軍節度使兼威武軍節度使副使檢校太尉
兼侍中王延稟加兼中書令詔諸州得替防禦團練使
刺史並宜于班行比擬如未有員闕可隨常參官逐日

立班新例也辛巳詔揀年少宮人及西川宮人並還其
家無家可歸者任從所適甲申以前齊州防禦使孫璋
爲鄆州節度使戊子以右散騎常侍陸崇卒廢朝崇爲
福建冊使卒於明州贈兵部尙書宿州進白兔安重誨
謂其使曰豐年爲上瑞免懷狡性雖白何爲命退歸八
月甲午以前鄧州節度使盧文進爲左衛上將軍北京
奏吐渾千餘帳內附於天池川安置禁在京百司影射
州縣稅戶乙未捧聖軍使李行德十將張儉告密人邊
彥溫並族誅以其誣告安重誨私市兵仗故也以前許
州節度使張延朗爲檢校太傅行兵部尙書充三司使

三司之有使額自延朗始也初中書覆奏授延朗諸道
鹽鐵轉運等使兼判戶部度支事奏入宣旨曰會計之
司國朝重事將總成其事額俾專委于近臣貴便一時
何循往例兼移內職可示新規張延朗可充三司使班
在宣徽使下癸卯北京奏生吐渾內附欲于嵐州安族
帳都官員外郎知制誥張昭遠奏請依國朝舊例選郎
官御史分行天下宣問風俗興利除害不報壬寅皇子
河南尹判六軍諸衛事從榮封秦王仍令所司擇日册
命五代會要長興元年九月太常禮院奏草定秦王儀注博士段頤議曰據開元禮臨軒册禮命諸王大臣其日受册者朝服從第鹵簿與百官俱集朝堂就次受册訖通事舍人引不載謁朝還第之儀自開元以後册

拜諸王皆正衙命使詣延英進冊皇帝御內殿高品引王入立于位高品宣制讀冊王受冊訖歸院亦無乘輅謁朝之禮臣按五禮精義云古者皆因禘嘗而頒爵祿所以示無自專稟之于祖宗也今雖冊命不在烝嘗然拜大官封大邑必至殿廷敬慎之道也今當司欲準開元禮其日秦王服朝服自理所乘輅車備鹵簿與羣臣俱集朝堂就次受冊訖至應天門外奉冊置于載冊之車秦王升輅出謁太廟訖歸理所儀仗鹵簿如來時之儀從

戊申兗州奏淮南海州都指揮使王傳拯殺本州刺史陳宣焚燒州城以所部兵士及家口五千人歸國至沂州帝遣使慰納之庚戌正衙命使冊福慶長公主孟氏以前雄武軍節度使王思同爲左武衛上將軍以前鳳州節度使陳臯爲右威衛上將軍王子正衙命使赴太原冊永甯公主石氏乙卯以左監門衛上將軍陳

延福卒廢朝丙辰皇子鎮州節度使從厚封宋王仍令
擇日冊命九月乙丑階州刺史王宏贄上言一州主客
戶纔及千數並無縣局臣今檢括得新舊主客已及三
千二百欲依舊額立將利福津二縣請置令佐從之丁
丑詔天下諸州府不得奏荐着紫衣官員爲州縣官戊
寅升尙書右丞爲正四品癸未利閬遂三州奏東川節
度使董璋謀叛結連西川孟知祥甲申以鎮州節度使
范延光爲檢校太傅守刑部尙書充樞密使利州閬州
進納東川檄書言將兵擊利閬責以間諜朝廷爲名乙
酉以左驍衛上將軍趙在禮爲同州節度使兼四面行

營馬步軍都指揮使樞密院直學士守工部侍郎閻至
樞密院直學士守尙書右丞史圭並轉戶部侍郎依前
充職以翰林學士守戶部侍郎李懌爲尙書右丞以翰
林學士戶部侍郎劉昫爲兵部侍郎以翰林學士中書
舍人竇夢徵爲工部侍郎依前充職以中書舍人劉贊
爲御史中丞以御史中丞許光義爲兵部侍郎以兵部
侍郎姚顗爲吏部侍郎丙戌詔東川節度使董璋可削
奪在身官爵仍徵兵進討丁亥以西川節度使孟知祥
兼西南面供饋使天雄軍節度使石敬瑭兼東川行營
都招討使以遂州節度使夏魯奇兼東川行營招討副

使庚寅以右衛上將軍王思同爲京兆尹充西京留守
兼西南行營馬步都虞候冬十月壬辰以太子少傅李
琪卒廢朝癸巳以鄜州節度使米君立卒廢朝詔凡賻
贈布帛言段不言端匹段者二丈也宜令三司依此給
付甲午正衙命使冊興平公主于宋州節度使駙馬都
尉趙延壽之私第巳亥以左驍衛上將軍李從璋爲陝
州節度使陝州節度使劉彥琮移鎮邠州尙書博士田
敏請依舊典藏永頒永以消陰陽愆伏之沴詔從之
五代會要載原敕云藏永之制載在前經獻廟之儀廢于近代既朝臣之特舉案典禮以宜行田敏所奏祭司寒獻羔事宜依其桃弧棘矢事久不行理難備創其諸侯亦宜準往制藏永乙巳供奉官張仁

暉自利州回奏董璋攻陷閬州節度使李仁矩舉家遇害丁未宮苑使董光業并妻子並斬于市董璋之子也辛亥以武安軍節度副使洪鄂道行營副都統檢校太尉馬希聲爲武安軍節度使加兼侍中時湖南馬殷奏久病不任軍政乞以男希聲爲帥故有是命中書奏吏部流內銓諸色選人所試判兩節度欲委定其等第文優者超一資其次者次資又次者以同類道理全疎者于同類中少人戶處注擬從之十一月庚申朔帝御文明殿冊皇子秦王仗衛樂懸如儀甲子正衙命使冊皇子宋王于鎮州是日幸龍門翌日馮道奏曰陛下官中

無事遊幸近郊則可矣若涉厯山險萬一馬足蹉跌則
貽臣下之憂臣聞千金之子坐不垂堂百金之子立不
倚衡况貴爲天子豈可自輕哉帝歛容謝之退令小黃
門至中書問道垂堂倚衡之義道因注解以聞帝深納
之己巳故太子少保致仕封舜卿贈太子少傅庚午應
州節度使張敬達移雲州以捧聖都指揮使守恩州刺
史沙彥詢爲應州節度使以潁州團練使高行周爲安
北都護充振武節度使壬申黔南節度使楊漢章棄城
奔忠州爲董璋所攻也乙亥制西川節度使孟知祥削
奪官爵以其同璋叛也丙子以前同州節度使羅周敬

爲左監門上將軍丁丑故兵部侍郎許光義贈禮部尙
書辛巳西面軍前奏今月十三日階州刺史王弘贇瀘
州刺史馮暉自利州取山路出劔門關外倒下殺敗董
璋守關兵士三千餘人收復劍州甲申日南至帝御文
明殿受朝賀丙戌以給事中鄭韜光爲左散騎常侍青
州奏得登州狀契丹案巴堅舊作阿保機今改正男東丹王托允
舊作突欲今改正越海來歸國契丹國志時東丹王失職怨望因率其部四十餘人越海歸唐
十二月乙未荆南奏湖南節度使楚國王馬殷薨廢朝
三日庚子以前襄州節度使安元信爲宋州節度使辛
丑幸苑中丁未以二王後秘書丞襲鄴國公楊仁矩卒

輟朝贈工部郎中庚戌湖南節度使馬希聲起復加兼
中書令王子以樞密院直學士戶部侍郎閻至爲澤州
刺史樞密院直學士戶部侍郎史圭爲貝州刺史甲寅
遣樞密使安重誨赴西面軍前時帝以蜀路險阻進兵
艱難潼關已西物價甚賤百姓輓運至利州率一斛不
得一斗謂侍臣曰關西勞擾未有成功誰能辦吾事者朕
須自行安重誨曰此臣之責也臣請行帝許之言訖而
辭翌日遂行甲寅故西川兵馬都監泗州防禦使李嚴
贈太傅丙辰車駕畋于西山獵也丁巳迴鶻遣使來朝
貢戊午故荆南節度使檢校太尉兼尙書令南平王高

季興贈太尉

永樂大典卷七
千一百六十五

舊五代史卷四十一終

舊五代史卷四十一攷證

唐明宗紀七癸丑索自通藥彥稠等奏收復河中 案
通鑑作辛亥索自通拔河中斬楊彥溫癸丑傳首來
獻歐陽史亦作辛亥自通執彥溫殺之較是書爲詳
審

張延朗可充三司使班在宣徽使下 案宋史職官志
三司使在宣徽使後蓋仍後唐之制

淮南海州都指揮使王傳拯 王傳拯歐陽史作傳極
攷是書列傳及通鑑並作傳拯疑歐陽史傳刻之訛
乙巳供奉官張仁暉自利州迴奏董璋攻陷閬州 案

董璋陷閬州通鑑作九月庚辰歐陽史作十月乙巳
蓋以奏聞之日爲據也

辛巳西面軍前奏今月十三日階州刺史王安贄瀘州
刺史馮暉自利州取山路出劍門關外倒下殺敗董
璋守關兵士三千人收復劍州 案通鑑攷異引唐
實錄作今月十三日大軍進攻入劍門次十七日收
下劍州是書統繫于十三日疑有舛誤

安巴堅舊作阿保機今改 托雲舊作突欲今改

舊五代史卷四十一攷證

舊五代史卷四十二

宋司空同中書門下平章事薛居正等撰

明宗紀第八

唐書十八

長興二年春正月庚申朔帝御明堂殿受朝賀仗衛如儀乙丑詔曰故天策上將軍守太師尚書令楚國王馬殷品位俱高封崇已極無官可贈宜賜諡及神道碑文仍以王禮葬壬申契丹東丹托允舊作突欲今改正自渤海國

率眾到闕帝慰勞久之賜賚加等百寮稱賀丙子以沙州節度使曹義金兼中書令丁丑東丹托允進本國印三紐庚辰以靜江軍節度使馬寶卒廢朝贈尚書令丙

戊荆南節度高從誨落起復加兼中書令二月己丑朔以宋州節度使趙延壽爲左武衛上將軍充宣徽北院使癸巳詔貢院舊例夜試進士今後晝試排門齊入卽日試畢丁酉幸至德宮又幸安元信東丹托允之第辛丑以鴻臚卿致仕賈馥卒廢朝以樞密院使守太尉兼中書令安重誨爲檢校太師兼中書令充河中節度使進封沂國公己酉以右威衛上將軍陳臯爲洋州節度使詔諸府少尹上任以二十五日爲限諸州刺史諸道行軍司馬副使兩使判官已下賓職團防軍事判官推官府縣官等俱以三十日爲限幕職隨府者不在此例

癸丑邠州節度使李敬周移鎮徐州詔禁天下不得開
發無主墳墓三月辛酉詔渤海國人皇王托允宜賜姓
東丹名慕華仍授檢校太保安東都護充懷化軍節度
瑞鎮等州觀察等使其從慕華歸國部校各授懷化歸
德將軍中郎將先於定州擒獲蕃將特哩袞宜賜姓狄
名懷惠哲爾格宜賜姓列名知恩並授檢校右散騎常
侍錫里扎拉宜賜姓原名知感英格宜賜姓服名懷造
奚王副使竭失訖宜賜姓乙名懷宥三人並授檢校太
子賓客甲子以前鴻臚卿王瓊爲太僕卿丙寅以皇子
從珂爲左衛大將軍從珂自河中失守歸清化里第至

是安重誨出鎮河中帝召見泣而謂之曰如重誨意爾
安得更相見耶因有是命王申以滄州節度使孔循卒
廢朝乙亥以西京留守權知興元軍府事王思同爲山
南西道節度使充西面行營馬步軍都虞候庚辰以少
府監聶延祚爲殿中監以前雲州節度使楊漢章爲安
州節度使乙酉太師致仕錢鏐復授天下兵馬都元帥
尙父吳越國王以其子兩浙節度使元瓘等上表首罪
故有是命丁亥以太常卿李愚爲中書侍郎平章事集
賢殿大學士夏四月辛卯制德妃王氏進位淑妃詔錢
鏐依舊賜不名誅內官安希倫以其受安重誨密指令

于內中伺帝起居故也丁酉幸會節園宴羣臣因幸河
南府詔罷州縣官到任後率歛爲地圖又禁人毀廢所
在碑碣戊戌詔今年四月禘饗太廟故昭義節度使李
嗣昭故幽州節度使周德威故汴州節度使符存審並
配饗莊宗廟庭己亥以前徐州節度使張虔釗爲鳳翔
節度使癸卯以汴州節度副使藥縱之爲戶部侍郎前
宗正卿李諧爲將作監甲辰以宣徽北院使左衛上將
軍趙延壽爲檢校太傅行禮部尙書充樞密使乙巳潞
州節度使劉仲殷移鎮秦州帝幸龍門佛寺祈雨己酉
天雄軍節度使石敬瑭兼六軍諸衛副使辛亥以前鳳

翔節度使朱弘昭爲左武衛上將軍充宣徽南院使壬

子以兵部尙書盧質爲河陽節度使甲寅以遂州節度

使夏魯奇歿於王事廢朝

案通鑑正月庚午李仁罕陷遂州夏魯奇自殺歐陽史作

四月甲寅董璋陷遂州武信軍節度使夏魯奇死之與通鑑異以薛史考之歐陽史蓋誤以奏聞之日爲城陷

之月宜五月戊午朔帝御文明殿受朝庚申以三司使

行工部尙書張延朗爲兗州節度使辛酉詔近聞百執

事等或親居內職或貴列廷臣或宣達君恩或勾當公

事經由列鎮干撓諸侯指射職員安排親昵或潛示意

旨或顯發書題自今後一切止絕有所犯者發薦人貶

官薦人流配如逐處長吏自徇人情只仰被替人詣闕

上訴長吏罰兩月俸發荐人更加一等被替人却令依舊甲子都官郎中知制誥崔稅上言請搜訪宣宗已來野史以備編修從之丁卯詔諸州府城郭內依舊禁麴其麴官中自造減舊價之半貨賣應田畝上所徵麴錢並放鄉村人戶一任私造時甚便之戊辰中書奏應朝臣丁憂者望加頒賚從之丁丑以秘書監劉岳爲太常卿已卯以武德使孟漢瓊爲右衛大將軍知內侍省充宣徽北院使辛巳以前相州刺史孟鵠爲左驍衛大將軍充三司使甲申以權知朗州軍州事守永州刺史馬希範爲洪州節度使檢校太傅以權知桂州軍府事富

州刺史馬希彝爲鄂州節度使檢校司徒乙酉以左金
吾大將軍薄文爲晉州留後鴻臚卿柳膺將齋郎文書
賣與同姓人柳居則伏罪大理寺斷當大辟緣經赦減
死追奪見任官終身不齒詔應見任前資守選官等所
有本朝及梁朝出身歷任告身並仰送納委所在磨勘
換給公憑只以中興已來官誥及近受文書敘理其諸
色蔭補子孫如非虛假不計庶嫡並宜敘錄如實無子
孫別立人繼嗣已補得身名者只許敘蔭一人其不合
敘使文書限百日內焚毀須絕此後更敢將合焚文書
參選求仕其所犯之人並傳者並當極法應合得資蔭

出身人並須依格依令施行閏月庚寅制河中節度使
檢校太師兼中書令安重誨可太子太師致仕是日重
誨男崇緒等潛歸河中以右散騎常侍張文寶爲兵部
侍郎夔州節度使安崇阮棄城歸闕待罪於閤門詔釋
之時董璋寇峽內諸州崇阮望風遁走壬辰陝州節度
使李從璋移鎮河中癸丑升廬州爲昭順軍甲午以衡
州刺史姚彥章爲昭順軍節度使丁酉安重誨奏男崇
贊崇緒等到州臣已拘送赴闕崇緒至陝州詔令下獄
已亥詔安重誨宜削奪在身官爵並妻阿張男崇贊崇
緒等並賜死其餘親不問壬寅以尙書左丞崔居儉爲

工部尙書以吏部侍郎王權爲尙書左丞丙午以隨駕
馬軍都指揮使宜州節度使安從進爲陝州節度使丁
未以前中書舍人楊凝式爲左散騎常侍戊申以右龍
武統軍王景戡爲新州節度使己酉以右領軍上將軍
李肅爲左金吾大將軍壬子以隨駕步軍都指揮使藥
彥稠爲邠州節度使癸丑以邠州節度使劉行瑑卒廢
朝贈太傅詔有司及天下州縣于律令格式六典中錄
本局公事書于庭壁令其遵行六月丁巳朔復置明法
科同開元禮乙丑以皇子左衛大將軍從珂依前檢校
太傅加同平章事行京兆尹充西都留守庚午以邠州

節度使張溫爲右龍武統軍甲戌以魏徵八代孫韶爲
安定縣主簿乙亥以鎮州節度使宋王從厚爲興唐尹
以石敬瑭爲河陽天雄軍節度使以天雄軍節度使石
敬瑭爲河陽節度使依前六軍諸衛副使丙子詔諸道
觀察使均補苗稅將有力人戶出剩田苗補貧下不逮
頃畝有嗣者排改檢括自今年起爲定額乙卯定州節
度使李從敏移鎮州節度使盧質爲滄州節度使庚辰
皇孫太子舍人重美授司勳員外郎重眞已下六人並
授同正將軍及檢校官壬午以前秦州節度使李德瓌
爲定州節度使兼北面行營副招討使太原地震詔天

下州府斷獄先于案牘之上坐所該律令格式及新勅
然後區分乙酉以前黔州節度使楊漢賓爲羽林統軍
詔止絕諸射係省店宅莊園秋七月庚寅以權侍衛馬
軍都指揮使登州刺史張從寔爲壽州節度使兼侍衛
步軍都指揮使壬辰福建王延鈞上言當境廟七所乞
封王號勅如諸史傳有名宜封爲閩越富義王其餘任
自於境內祭享乙未詔諸道奏荐州縣官使相先許一
年薦三人今許薦五人不帶使相先許薦二人今許薦
三人直屬京防禦團練使先許薦一人今許薦二人詔
應州縣官內有曾在朝行及曾佐幕府罷任後準前資

朝官賓從別處分其帶省銜並內供奉裏行及諸色出選門者或降授令錄罷任日並依出選門例處分便與除官更不再赴常調州縣官其間書得十六考者準格敘加朝散階亦準出選門例處分三司奏先許百姓造麴不來官場收買伏恐課額不逮請復已前麴法鄉戶與在城條法一例指揮仍據已造到麴納官量支還麥本從之甲辰前晉州節度使朱漢賓授太子少保致仕庚戌大理正劇可久責授登州司戶刑部員外郎裴選責授衛尉寺丞刑部侍郎李光序判大理卿事任贊各降一官罰一季俸坐斷罪失人也八月丙寅詔天下州

府商稅務並委逐處差人依省司年額勾當納官以故
鎮州節度使趙王王鎔男昭誨爲朝議大夫司農少卿
賜紫金魚袋繼絕也辛丑升虔州爲昭信軍癸亥以太
常少卿盧文紀爲秘書監以秘書馬縞爲太子賓客左
監門上將軍羅周敬爲右領軍上將軍前懷州刺史婁
維英爲左監門上將軍乙丑詔大理寺官員宜同臺省
官例升進法直官比禮直官任使仍于諸道贓罰錢內
每月支錢一百貫文賜刑部大理兩司其刑部於所賜
錢三分與一分丙寅以武平軍節度使馬希振依前檢
校太尉兼侍中充虔州昭信軍節度使詔百官職吏應

選授外官者考滿日並委本州申奏追還本司依舊職
行公事己巳太傅致仕王建立太子少保致仕朱漢賓
皆上章求歸鄉里詔外內致仕官凡要出入不在拘束
之限辛未以翰林學士兵部侍郎劉昫守本官充端明
殿學士以左拾遺直樞密院李崧充樞密直學士壬申
以左龍武統軍李承約爲潞州節度使癸酉詔文武百
官五日內殿起居仍舊其輪次轉對若有封事許非時
上表朔望入閣待制候對一依舊制乙亥翰林學士工
部侍郎竇夢徵卒丁丑以前西京副留守梁文矩爲兵
部尙書乙卯詔不得薦銀青階爲州縣官壬午詔應有

朝臣藩侯郡守凡欲營葬未曾封贈許追封贈禮部尙書致仕李德休卒九月丙戌以前兗州節度使符彥超爲左龍武統軍己亥懷化軍節度使東丹慕華賜姓名李贊華改封隴西縣開國公應有先配諸軍契丹並賜姓名詔天下營田務只許耕無主荒田各召浮客不得留占屬縣編戶辛丑樞密使檢校太傅刑部尙書范延光加同平章事使如故壬寅以中書舍人封翹爲禮部侍郎禮部侍郎盧澹爲戶部侍郎癸卯許州節度使李從溫移鎮河東詔天下州縣官不得與部內富民於公廳同坐辛亥詔五坊見在鷹隼之類並可就山林解放

今後不許進獻冬十月戊午以前北京留守太原尹馮
贊爲許州節度使辛酉左補闕李祥上疏以北京地震
多日請遣使臣往彼慰撫察問疾苦祭祀山川從之先
是太原留後密奏無敢言者及祥有是奏帝甚嘉之改
賜章服丙寅詔應在朝臣寮藩侯郡守準例合得追贈
者新授命後便於所司投狀旋與施行封妻蔭子準格
合得者亦與施行外官曾任朝班據在朝品秩格例合
得封贈敘封者並與施行其補蔭據資蔭合得者先受
官者先與收補後受官者據月日次第施行從之十一
月甲申朔日有蝕之巳丑日南至帝御文明殿受賀丁

酉以翰林學士起居郎張礪爲兵部員外郎知制誥充
職以汝州防禦使張希崇爲靈州兩使留後庚子以左
威衛上將軍華溫琪爲華州節度使福州節度使王延
鈞奏誅建州節度使王延稟及其子繼雄壬寅詔今後
諸道兩使判官罷任一年與比擬書記支使防禦團練
判官二年推廵軍事判官並三年後與比擬仍每遇除
授量與改轉官資或階勲職次云以御史中丞劉贊爲
刑部侍郎以鳳州節度使孫岳充西面閣道使壬子鄆
州奏黃河暴漲漂溺四千餘戶癸丑以給事中崔衍爲
御史中丞十二月甲寅朔詔開鐵禁許百姓自鑄農器

什器之屬於秋夏田畝上每畝輸農器錢一文五分乙卯畋於西郊丁巳以彰武軍節度使劉訓卒廢朝庚午以前利州節度使康思立爲陝州節度使秦州地震丁丑詔三司所過西川兵士家屬常令瞻給

永樂大典卷七千一百六

五十

舊五代史卷四十二終

舊五代史卷四十二攷證

唐明宗紀八王申契丹東丹王托雲自渤海國率其眾
到闕 案托雲歸唐五代春秋作二年正月蓋以到
闕之日爲據歐陽史作四年十一月丙戌蓋以奏聞
之日爲據

以沙州節度使曹義金兼中書令 沙州原本作汝州
今據通鑑改正

見禁囚徒除死罪外並放 案歐陽史作乙卯以旱赦
流罪以下囚與是書作壬子異

詔安重誨宜削奪在身官爵並妻阿張男崇贊崇緒等

並賜死 案重誨見殺是書作閏月己亥歐陽史作
閏五月丁酉五代春秋作五月

以前黔州節度使楊漢賓爲羽林統軍 漢賓原本作
漢章攷上文有雲州節度作楊漢章不應黔州節度
使與之同名今據通鑑改正

辛亥詔五坊見在鷹隼之類並可就山林解放 辛亥
歐陽史作丁亥通鑑從是書

扎雲舊作突欲今改 特哩充舊作惕隱今改 扎古
舊作則骨今改 錫里扎拉舊作舍利則刺今改
裕勒古舊作械骨今改 格斯齊舊作竭失訖今改

舊五代史卷四十二攷證